

聖

武

記

聖武記敘

荆楚以南有積威之民焉生於乾隆征楚苗之前一歲中更嘉慶征教匪征海寇之歲迄十八載畿輔靖賊之歲始貢京師又迄道光征回疆之歲始筮仕京師京師掌故海也得借觀史館秘閣官書及士大夫私家著述故老傳說於是我生以後數大事及我生以前上訖

國初數十大事磊落乎耳目旁薄乎胸臆因以溯洄于民力物力之盛衰人材風俗進退消息之本末晚僑江淮海警廳忽軍問沓至愾然觸其中之所積乃盡發其積藏排比經緯馳騁往復先取其涉兵事及所論議若

千篇爲十有四卷統四十餘萬言告成於海夷就款江寧之月乃敬敘其端曰天地以五行戰陰陽聖人飭五官則戰勝於廟堂戰勝廟堂者如之何曰 聖清尙

矣請言

聖清以前之事今夫財用不足國非貧人

材不競之謂貧令不行於海外國非羸令不行於境內之謂羸故先王不患財用而惟亟人材不憂不逞志於四夷而憂不逞志於四境官無不材則國楨富境無廢令則國柄強楨富柄強則以之詰奸奸不處以之治財財不蠹以之蒐器器不窳以之練士士無虛伍如是何患於四夷何憂乎禦侮斯之謂折衝於尊俎嘗觀周漢唐

宋金元明之中葉矣。瞻其闕夫，豈無懸令詢其廷夫？豈無充位人見其令雷行於九服而不知其令未出階闥也？人見其材雲布乎九列十二牧而不知其槁伏於灌莽也？無一政能申軍法則佚民玩無一材堪充軍吏則敖民狂無一事非耗軍實則四民皆荒佚民玩則畫箠不能令一羊敖民狂則蟄雷不能破一牆四民皆荒然且今日揖於堂明日觴於隍後日肱於藏以節制輕桓文以富強歸管商以火烈金肅議成湯奚必更問其勝負於疆場矣？記曰物恥足以振之國恥足以興之故昔帝王處蒙業久安之世當渙汗大號之日必兢兢以

軍令飭天下之人心皇然以軍事軍食延天下之人材
人材進則軍政修人心肅則國威邁一喜四海春一怒
四海秋五官強五兵昌禁止令行四夷來王是之謂戰
勝於廟堂是以後聖師前聖後王師前王師前聖前王
莫近於我 烈祖 神宗矣書曰其克詰爾戎兵
以繼禹之迹方行天下至於海表以覲文王之耿光以
揚武王之大烈用敢拜手稽首作 聖武記

道光二十有二載元默攝提格之歲孟秋相月哉生魄
內閣中書舍人邵陽魏源敘于江都絜園

聖武記目錄

卷一 開創

開國龍興記一

開國龍興記二

開國龍興記三

開國龍興記四

開國龍興記五

卷二 藩鎮

康熙戡定三藩記上

康熙戡定三藩記下

卷三 外藩

國朝綏服蒙古記一

國朝綏服蒙古記二

國朝綏服蒙古記三

康熙 親征準噶爾記

雍正兩征厄魯特記

卷四 外藩

乾隆蕩平準部記

乾隆戡定回疆記

乾隆綏服西屬國記

乾隆新疆後事記

道光重定回疆記

卷五 外藩

國朝撫綏西藏記上

國朝撫綏西藏記下

西藏後記

乾隆征廓爾喀記

廓爾喀附記

卷六 外藩

國朝俄羅斯盟聘記

國初征撫朝鮮記

乾隆征緬甸記

乾隆征撫安南記

卷七

土司苗獠回民

雍正西南夷改流記上

雍正西南夷改流記下

乾隆初征金川土司記上

乾隆再征金川土司記下

乾隆甘肅再征叛回記

乾隆湖貴征苗記

道光湖粵平獠記

卷八

海寇民變兵變

國初東南靖海記

康熙戡定臺灣記

康熙重定臺灣記

乾隆三定臺灣記

嘉慶東南靖海記

康熙武昌兵變記

嘉慶寧陝兵變記

乾隆臨清剿賊記

卷九 教匪

嘉慶川湖陝靖寇記一

嘉慶川湖陝靖寇記二

嘉慶川湖陝靖寇記三

嘉慶川湖陝靖寇記四

卷十 教匪

嘉慶川湖陝靖寇記五

嘉慶川湖陝靖寇記六

嘉慶川湖陝靖寇記七

嘉慶畿輔靖變記

卷十一

武事餘記 兵制兵餉

卷十二

武事餘記掌故考證

卷十三

武事餘記事功雜述

卷十四

武事餘記議武五篇

聖武記卷一

邵陽魏源撰

開國龍興記一

維帝軒轅畫井始遼粵及有虞州割十二而遼以西則
剖冀東北境是爲幽州遼以東則剖青海外境是爲營
州于是有古孤竹之虛有古肅慎氏之國古孤竹國在今遼西錦州府地肅慎國在今遼東吉林寧古塔地肅慎卽女真之轉音楛矢肇騎射之本俗至漢分爲三韓蓋三汗並治之
天官書曰中國山川其維首在隴蜀其尾沒于碣渤
蓋東方出震天地所以成終而成始旁薄鬱積數千年
以有 大清國 大清國之興也肇有金遼部落

繼兼有元裔之蒙古

繼兼有朝鮮又繼有明之關

外金遼語言相同之國也蒙古語言居處不同而衣冠騎射同之國也至朝鮮及明則語言衣冠皆不同故我太祖太宗用兵次第亦因之爲先後其朝鮮蒙古事屬外藩別爲篇今特先其收服滿洲諸部者冠于伐明之前以昭造攻自毫之本

自山海關以東

留都之地統以

盛京吉林黑

龍江三將軍吉林爲滿洲舊國

始祖所都之寧古

塔在焉黑龍江爲遼金舊國金起混同江而索倫則遼

裔也

遼起上京卽今黑龍江北之呼倫貝爾地也金則起于黑龍江南在白都訥之東二三百里惟

盛京稍東之

興京則

肇

興

景

顯四祖及

太祖發祥之地舊名赫圖阿拉在

蘇克素護河嘉哈河之間西距

盛京二百七十里

東距寧古塔千二百里

之野始祖鄂多里城居俄漠惠

故州仍稱寧古塔貝勒我朝未得遼瀋以前四世咸宅于

茲卽明代之建州右衛也我

太祖高皇帝生明嘉

靖三十有八年溯之

肇祖當在明正統景泰之際

由肇祖而上至長白發祥之

始祖當在遼金

末造矣

據開國方略載天女所生

始祖傳數世而

生數世

太祖責烏拉貝勒布占泰曰我愛新覺羅上天降

聖武記

卷十

二

以來亦不知耶此明萬歷十有一年 太祖年二十

世數不遠之明證 有五國人號聰睿貝勒以 景 顯二祖之讐起

兵討尼堪外蘭率甲十三襲之于圖倫城尼堪外蘭倉
卒遁得甲三十卒百人以歸又討之于嘉班城于撫順
邊外皆不獲初 景祖世兄弟五人各築城環赫圖

阿拉而居遠者二十里近者五六里皆稱寧古塔貝勒
方 太祖起兵也同族之附明者謂尼堪外蘭爲明
所善懼 太祖招禍于明聚誓 堂子屢謀除害

太祖有衆一旅克兆嘉城瑪爾墩城皆險固之區
或鑿磴束馬而登或單盾冒矢石而克同族讐服 萬歷
十二

年是時諸國分裂滿洲國之部五曰蘇克素護河曰渾
河曰完顏曰棟鄂曰哲陳長白山國之部二曰訥殷曰
鴨綠東海國之部三曰渥集亦作窩集曰瓦爾喀曰庫爾喀
庫一作虎扈倫國之部四扈倫亦作呼倫曰葉赫曰哈達曰輝發曰
烏拉皆金代部落之遺城郭土著射獵之國非蒙古行
國比也各主其方爭相雄長強凌弱衆暴寡而扈倫四
部最強在滿洲之北惟烏拉在吉林當滿洲東北其輝發哈達葉赫皆在興京之北
今盛京將軍所轄境內皆以所居之河得名烏拉輝發二河入
松花江哈達葉赫二河入遼河卽明之海西衛與建州
衛野人衛而三海西亦謂之南關北關南關哈達北關

葉赫偏處開原鐵嶺乃明邊之外障也東海三部則皆野人衛在寧古塔以東瀕海島嶼距明邊絕遠羈縻而已而滿洲五部長白山二部則皆建州衛處遼瀋之東世相仇敵故尼堪外蘭遠遁築城于鄂勒琿恃諸部中隔我兵不能往討

太祖乃先自近部始萬歷十二年以兵五百攻棟鄂部之翁鄂洛城萬歷十三年攻渾河部之界藩城棟嘉城薩爾汗城與一弟三侍衛奔軍先進渡河衝陣龍騰虎蹴以四人敗敵八百十四年復攻蘇克素護河之爪爾佳城渾河部之貝琿城哲陳部之托摩和城皆克之遂越諸部攻尼堪外蘭于鄂勒琿

城罪人斯得先是明歸我

二祖喪時已給都督

敕書十道馬三十匹至是又給龍虎將軍之印及歲幣銀八百兩萬歷十五年命巴圖魯額亦都攻哲陳部二城阻漲渾河聯繩而渡跨堞而戰身中五十餘創卒克之萬歷十六年復克完顏部時滿洲環境五豪部皆服全有建州遂與海西部爲敵國土產東珠人獲紫貂元狐狴獠與明市于撫順清河寬甸遼陽四關兵食日強富十有七年又遣兵收服長白之鴨綠江部盡有其衆于是遐邇讐忌知

太祖志不小遂協而圖我

萬歷二十有一年葉赫哈達輝發烏拉

扈倫四部科爾沁錫

伯卦勒察

蒙古三部

珠舍里訥殷

長白山二部

九國之師三萬來

侵營渾河北岸國人皆懼

太祖酣寢達旦詰朝率

諸貝勒拜堂子啟行至古呼山據險而陣諭將士曰烏合之衆其心不一殪其前鋒必反走走而乘之必大克時敵方攻赫濟格城命額亦都以百騎挑之敵罷攻來戰葉赫貝勒布齋科爾沁貝勒明安身先督陣布齋馬觸木而踣我兵斬之明安馬陷淖奔鞍跨驪馬遁衆軍遂潰乘勝逐北斬級四千獲馬三千鎧冑千并禽烏拉貝勒之弟布占泰軍威大震萬歷二十五年葉赫哈達輝發四部遣使來乞盟締姻以其女弟歸太祖是

爲 高皇后初扈倫四部哈達萬汗最強且忠于明

爲葉赫輝發烏拉三部盟主傳其子蒙格布祿兄弟內
闖遂爲葉赫所乘哈達乞援于明不許請入捍邊又不
許于是質其三子來告急 太祖命費英東噶蓋以

兵二千助之哈達旋惑葉赫貝勒之誑令執我將帥以
索其三質子而襲攻我軍于是 太祖舉兵克之盡

降其城寨明使以滅鄰來責乃復其子武爾古岱歸國
時萬歷二十七年也旣而葉赫兵數掠哈達 太祖

使詰于明明人不問哈達饑乞糴于開原城明亦不與
哈達復降于我于是明塞亡南關是後我國始絕明貢

惟互市萬歷三十五年輝發貝勒以所部多叛歸葉赫遣子質我而樹援焉已又信葉赫貝勒之誑索還其子以質于葉赫所約之昏亦背不來取而築重城以拒守是年彗星東指輝發國太祖征之輝發以亡萬歷四十一年征烏拉初布占泰陣獲于我旋釋歸使主其國妻之以宗女錫之以敕書甲冑三十五年其所屬之瓦爾喀部來歸太祖遣褚英代善費英東以兵四千迎之布占泰以兵萬人阻之爲我軍所敗斬級獲甲各三千師還又遣褚英阿敏以兵五千克其宜罕山城布占泰懼不敢戰執獻葉赫之人以和并求昏

上親女許之四十年復背盟再侵我渥集部屬之虎爾哈路欲娶我國所聘葉赫之女又以鳴鏑射公主

太祖親臨烏拉河克其沿河五城盡焚其廬舍糗峙許盟而還布占泰復以其子質葉赫怒我師師至布占泰以兵三萬逆戰太祖身陷陣敗其軍先伏兵奪其城門盡樹纛幟布占泰收敗卒不能入遂奔葉赫烏拉以亡是秋遂以兵四萬征葉赫葉赫盡斂其鄉民保城使嚮于明日扈倫四國滿洲已滅其三今復侵我行必及明矣明使游擊馬時枏率火器千助葉赫

太祖服其七城十九寨旋師葉赫恃明之援遂以所許我

國之女歸蒙古時我

太祖天命之二年明萬歷四

十四年也

太祖旣誓師讎明截撫順夷清河遂以

天命四年

萬歷四十六年

春留兵六千守札喀關備明而自將

六師深入葉赫克二十餘寨葉赫告急于明于是明有

四路之師

太祖覆其軍二十萬是秋克開原克鐵

嶺拊葉赫之背遂圍其貝勒錦台什于東城圍其弟布

揚古于西域攻東城之軍先破其郭士皆擁盾冒矢石

穴城陷之錦台什登臺自燔死布揚古以西城降遂殲

守葉赫之明兵千于是明塞復亡北關其扈倫四國而

外用兵最勤且征且撫者莫如東海三部及黑龍江之

索倫等部其種族散處山林非有酋豪爲之雄長亦非如四扈倫之抗衡上國而兩朝勞徠招攜之故則見于天聰八年太宗諭諸將之征黑龍江者曰茲地人民語言騎射與我國同撫而有之卽皆可爲我用攻略時宜告以爾我先世本皆一國之人載籍甚明毋甘自外是時滿洲五部長白山二部扈倫四部皆平始從事于東海三部其用兵皆未嘗興大衆其收服之人卽校其射執區其等第編旗披甲與兼弱攻昧之師不同瓦爾喀部者沿瓦爾喀河入鴨綠江瀕海兩岸皆其部落在興京之南近朝鮮萬歷二十六年遣長子褚英

以千卒征之取其安楚庫路屯寨二十餘招降萬餘衆
三十六年瓦爾喀部優斐城長以五百戶越烏拉境來
歸遣費英東等以兵三千往護之中途敗烏拉要截之
兵三十七年與明盟誓并以瓦爾喀部落之流寓朝鮮
者請于明明爲我諭朝鮮察還千餘戶 太宗天聰

元年

明天啟七年

大兵征朝鮮我瓦爾喀之在其國者二百

餘戶皆來歸天聰九年

崇禎八年

命武巴海等以兵四百自

寧古塔往征瓦爾喀收丁壯五百有六十以地多島嶼
明年復分兵四路每路兵二三百各攜嚮導造海舫先
後共取還島丁千餘貂狐狍獐無算崇德五年命朝鮮

以舟師攻瓦爾喀之叛入熊島者來獻捷是爲征瓦爾喀之師虎爾哈部者

虎一作呼

居虎爾哈河出吉林烏拉界

徑寧古塔城北行七百里至三姓城入混同江唐書渤

海王都臨忽汗河者也

虎哈卽忽汗之音轉卽所謂金源也

萬歷三十九

年命額亦都以兵二千攻東海虎爾哈部之札庫塔人三日克其城俘斬三千并招降其附近五百戶天命三年東海虎爾哈路長率百戶來朝遣二百人迓之

御殿燕之命願留者左願歸者右賜願留頭目八人男婦各二十馬牛各十錦裘蟒服四時之衣田廬器賄皆具于是爭乞留且轉招其族屬曰上之征伐非欲俘獲

充賞也。乃欲收我爲羽翼也。天命四年萬歷四十六年遣卒千

征虎爾哈部。收其丁壯二千。其路長來降者。駕出

城親款之。列筵二百。男婦牲畜田廬器賄如前。賜崇德

八年遣阿爾津等征虎爾哈于黑龍江。混同江卽黑龍江之下游故混

同江亦通凡克三屯招降四屯。獲男婦二千八百餘。牲

畜貂皮虎豹皮。稱是是爲征虎爾哈部之師。渥集部者

在虎爾哈部之東。連山茂林。萬歷三十八年以卒千征

東海渥集部。取其三路屯寨。俘二千人。并降其虎爾哈

路瑚葉路而還。又有自歸之綏芬路寧古塔路。命額亦

都以千人往遷之。爲渥集之雅蘭路人所掠。遂擊收其

衆萬餘而還虎爾哈與渥集鄰故有在其部中者綏芬河在寧古塔之南圖門江之東自行入海

雅蘭河出長白山背在寧古塔東南行二百餘里入海三十九年復以兵千取渥

集部之烏爾固辰穆林二路俘千餘人穆林河會烏蘇里入混同江在

寧古塔是爲征渥集部之師外此東海小部隨時略服

天命元年萬歷四十四年征東海薩哈連路乘舟沿烏勒簡河

取屯寨數十八月至黑龍江岸霜未降冰結如橋師遂

濟及還上游復冰甫濟而解又招服南岸之諾羅路錫

拉忻路及使犬部音達琿塔庫喇二路諾羅河及音達穆河皆入混同

江使犬部亦在混同江南岸故知此所渡乃黑龍江下

游卽混同江也錫拉河在寧古塔極東自入海乃奇雅

喀部人所居天命二年萬歷四十五年遣兵四百收瀕海散處各部

其島居負險者剗小舟二百往盡取之。天命十年

天啟五年

遣兵征東海。卦勒察部俘二千人。蓋東海諸部在吉林

寧古塔以東。與我隔於烏拉。又貪烏拉布市之利。甘爲

其屬。故自烏拉削平而後。威稜薄海表。今吉林將軍治

烏拉故城。

吉林城在盛京東北八百二十里。在寧古塔西六百三十里。或云吉林卽古雞林。

其

所轄東西四千餘里。南北二千里。卽烏拉諸部故境。蓋

南沿鴨綠江。圖門江之間。及諸海島。爲東海瓦爾喀部。

北沿天烏拉河。松花江至混同南岸。則虎爾哈部。東抵

長白山陰。則渥集部。今大都并入滿洲矣。再東北則爲

使犬部之赫哲。使鹿部之奇勒爾費雅喀。又有庫頁部。

海島·衺廣·埒臺灣·近混同江海口·其島·雜有赫哲·費雅

哈·鄂·倫·春·之·人·而庫頁爲大·殆卽 國初·列舟·濟師

往取者·今與貢貂之赫哲諸部·皆不編·佐領·不列·滿洲

八旗·蓋·禹貢·皮服之鳥夷·介·冀·青·東·境·云·滿洲氏·族源

古塔·東北·行四百餘里·居·虎爾哈·河·松花江·兩岸者·曰

諾雷·部·卽·虎爾哈·部·自寧古塔·東·行千餘里·居·烏蘇里

江·兩岸者·曰·木倫·部·又·東·二百里·居·尼滿·河·源者·曰·奇

雅喀·喇·此·二部·卽·渥集·部·皆·東·路也·又·寧古塔·東·南·有

班吉·爾·漢喀·喇·去·烏蘇里·江·四千里·二年·一次·遣官·赴

尼滿·河·收貢·頒賜·此·南路也·自寧古塔·東·北·行千五百

里·居·松花江·混同江·兩岸者·曰·赫哲·喀·喇·又·東·北·行四

五百里·居·烏蘇里·松花江·混同江·三·江·匯流·左右者·亦·曰·赫

哲喀·喇·卽·使·大國也·又·東·北·行·逾·混同江·七八百里·曰·

費雅·哈·直·至·東·北·海·濱·距·寧古塔·三千里·曰·奇勒·爾·卽

使·賧·部也·至·黑龍江·等部·則·天命·以前·未嘗·征·征之·自

此·皆·北路也

太宗天聰九年始時有人貢索倫豪于騎射乃命副都統霸奇蘭率兵逾黑龍江收撫其未服壯丁二千四百有奇餘丁七千二百而還崇德元年索倫爲科爾沁部落侵掠命來朝之索倫部長速歸防禦五年遣穆什哈等征索倫俘其壯丁三千百有五十六年并徵蒙古兵征已降復叛之索倫博木果禽其衆九百餘蓋索倫當黑龍江極北興安大嶺之麓介俄羅斯及喀爾喀蒙古之間挽強命中洞熊兕跡犇獸雄于諸部

索倫村在額爾

格河精奇里江之間南距黑龍江城西至雅克薩城皆五六日程距今將軍所治齊齊哈爾城千有四百餘里在盛京東北二千四百餘里

天命間大兵雖一度黑龍江下游

仰混同江

未嘗至索倫。天聰崇德始臣絕域。際東北海。于是遼金部落咸并于滿洲矣。迨聖祖康熙十年。墨爾哲勒

氏屯長來歸。編爲墨爾根四十佐領。號新滿洲二十八。年征服羅刹。闢地至克魯倫河。興安大嶺。于是科爾沁。蒙古復獻出嫩江左右之錫伯。卦勒察。及黑龍江北之達瑚爾。壯丁萬四千有奇。達瑚爾亦在額爾格河精奇里江之間。與索倫同地。一作額爾古訥河精奇里江。又達瑚一作達呼。蓋打牲部落之錯鄰蒙古者。故獻歸滿洲。分駐白都訥。齊齊哈爾二城。編旗額。置佐領。皆隸于呼倫貝爾。駐防副都統而統于黑龍江將軍。呼倫泊貝爾泊皆黑龍江上源遼興于此。是爲上京。故東三

省伊犁駐防自滿洲蒙古漢軍外有索倫兵錫伯兵達
瑚爾兵鄂倫春兵卦勒察兵共編佐領九十有七皆打
牲部落異于游牧之蒙古非天聰天命間滿洲兵所有
也惟寧古塔以東諸打牲部落則皆不編佐領隸三姓
城駐防副都統而遙統以吉林將軍三姓城當寧古塔
東北五國城在焉
卽肅慎
故址

臣源曰恭稽會典八旗駐防之兵有游牧部落有打牲
部落游牧部落不一以蒙古統之打牲部落不一我

朝皆以滿洲統之康熙以後始以游牧之巴爾虎及
厄魯特隸于黑龍江駐防附打牲
部落之後雖亦爲東三省兵然非滿洲部落矣夫草昧之初以一城一旅敵中

原必先樹羽翼于同部故得朝鮮人十不若得蒙古人
一得蒙古人十不若得滿洲部落人一族類同則語言
同水土同衣冠居處同城郭土著射獵習俗同故

命文臣依國語製國書不用蒙古漢字而蒙古漢軍各
編旗籍不入滿洲八旗所以齊風氣一心志固基業規
模宏竒矣盛京興京境內皆老滿洲此外居近吉林之
錫伯人居近伯都訥之卦勒察人居近琿春之庫爾喀
人分駐佐領隨地隨時編丁入軍籍統稱爲吉林之兵
伯都訥城北瀕混同江黑龍江北之索倫達瑚爾二部
琿春河南入圖門江晝長夜暫北極出地五十一度視京師偏東十度有奇

崇德而後與東北之鄂倫春奔走疏附後先禦侮是爲
黑龍江之兵自索倫騎射聞天下于是後編入旗之達
瑚爾鄂倫春等部世皆索倫呼之而吉林一軍則但知
爲新滿洲矣女真兵滿萬不可敵况傾東北海之精銳
殫

兩神聖之訓練夫何敵於天下臣源又曰方

世祖之入關都燕也 命內大臣何洛會統八旗

兩翼兵留守

盛京康熙元年始設鎮守奉天等處

將軍

十年始改稱鎮守

盛京鎮守寧古塔將軍

十年移駐吉林二十二年

以寧古塔兵征羅刹於黑龍江始設鎮守黑龍江將軍
是爲東三省其後兵制增損裁并不一今姑據乾隆二

十三年會典之數則盛京將軍駐防兵萬有九千二百

七十六人

轄副都統三城守尉四防守尉二

吉林將軍駐防兵萬有四

千三百九十二人

轄副都統五協領一佐領二

黑龍將軍駐防兵八

千五百五十七人

轄副都統三總管一城守尉一

兼滿洲蒙古漢軍索

倫錫伯卦勒察已爾虎達瑚爾鄂倫春共東三省兵四

萬二千二百有奇其後移駐新疆裁并不一今東三省

共駐防兵三萬五千四百有奇

國家大征伐輒出

虎符選壯軍鋒然乾隆征金川時將軍阿桂溫福等皆

力言東三省道遠供億鉅徵索倫兵一不如調近省兵

三嘉慶征教匪時

上諭亦言調黑龍江兵一其費

可募鄉勇數十則又不專恃留都常勝之兵而各視其
時與地

開國龍興記二

太祖高皇帝天命元年受覆育列國英明尊號國號滿洲時明萬厯四十有四年太祖年五十有八矣海西四國平其三惟葉赫恃明之援負隅乎肘掖而明亦倚葉赫爲北關不利我之吞并也以火器兵助守葉赫并屯重兵于開原備犄角太祖議我都城偏遼瀋

將先圖葉赫則患明兵擣我之虛非大挫明兵奪其氣不可按兵休士二載廣儲峙利器械盡收諸部精銳天人協應迫時而動遂以天命三年興師伐明以七大憾誓告天地堂子步騎二萬發興京圍撫順降其游擊李

永芳及民千餘戶夷其城而還敗其追兵萬人陣斬總兵張承蔭秋復克清河城斬副將鄒儲賢及其兵萬并克撫安堡謙場堡皆毀之時我兵志在葉赫故所得明城堡皆不守天命四年

萬曆二十七年

春征葉赫

命大貝

勒代善等以兵五千守札喀關防明兵聞明師將大舉來犯引還是時明遼東經略楊鎬集兵瀋陽二十四萬四路深入每路兵六萬總兵杜松王宣趙夢麟出中路之左由渾河入撫順關張銓監之李如柏賀世賢出中路之右由清河入鴉鵲關閻鳴泰監之馬林麻岩出北路由開原會葉赫兵二萬入三岔口潘宗顏監之劉綎

出南路會朝鮮兵二萬入寬甸口康應乾監之而崔一琦別監朝鮮軍合趨我都城時蚩尤旗長竟天彗星見東方星隕地震識者皆知其必敗明大學士方從哲兵部尙書黃嘉善日發紅旗趣進兵御史王象恆力言非策引哥舒翰出潼關爲戒不聽期以二月二十一日出塞大雪期泄二十四日我太祖盡徵各路屯寨之兵集城中戒嚴以待明將杜松素勇輕敵欲立首功先期出撫順關日馳百餘里抵渾河河流急不結筏策馬徑渡軍多溺死而車營五百阻水不克渡三月朔我各路偵卒皆以明師告太祖議以南北二路皆山險

且遠敵不能卽至宜先敗其中路之兵時杜松以三萬

餘衆屯薩爾滸山而自引兵二萬圍界藩

距赫圖阿拉都城百二十

里我國築界藩城之夫役萬五千及防衛兵四百據吉

林厓以拒

太祖命大貝勒

四貝勒以二旗兵

援界藩

每旗七千五百共萬五千

而親統六旗兵攻薩爾滸大營

六旗

四萬五千人

明兵恃火礮甫戰日未昃忽大霾晦咫尺不相

辨明兵列炬以戰我兵從暗擊明萬矢雨集發無不中

而明兵從明擊暗銃礮皆中柳林我兵無一傷者遂乘

晦踰塹拔柵潰其軍三萬餘而右翼軍渡河援界藩者

先遣千騎合山上兵據高馳下與山下兵夾攻衝敵陣

爲數隊杜松中矢死逐北二十餘里漂尸及旌旗器仗
蔽渾河而下明北路兵聞之急據尙間厓環營三濠火
器列濠外而騎兵繼後又潘宗顏及游擊龔念遂各以
萬人分營數里外相犄角皆列大車拒騎突以堅楯禦
矢并據形勢而陣蓋楊鎬所授節度也龔念遂軍先與
我軍遇四貝勒引千騎橫衝之步兵繼進專攻一
隅斫其車破其楯太祖馳赴尙間厓明兵二萬陣
山麓太祖方趣我兵登山據高下擊而馬林營內
之兵出與濠外兵合太祖知敵將迎戰止兵勿登
山皆下馬步戰傳令復未徧而明兵已自西突至大貝

勒卽怒馬直入其陣二貝勒阿敏三貝勒莽古爾泰麾
二旗兵繼之于是後至之六旗兵皆不及布陣縱馬馳
突人自爲戰諸貝勒兵已貫陣出其背與大軍表裏夾
擊呼聲震天地明兵瓦解泥籍尙間厓下河爲之赤復
破潘宗顏軍于芬斐山馬林收殘卒走開原而葉赫兵
已于中途遁還于是兩路軍皆破明楊鎬聞之急檄止
李如柏劉綎二軍惟如柏得檄還而綎軍已涉險深入
距都城五十餘里尙未知西北路敗信也 太祖移
軍禦之留兵四千守都城綎軍連破數寨潰我駐防兵
五百我軍聞其節制嚴整軍行皆持鹿角止卽成陣礮

車火器甚練。乃使降卒之黠者持杜松令箭往言西軍已薄敵城。促之速進。綖以無號礮爲詰。卒詭詞而返。急令傳礮。綖行二十里間。礮聲大起。心恐西路軍專其功。惟虞足之不前。下令棄鹿角而進。道狹分四萬兵爲四軍。前二軍皆其精銳。第一軍陣阿布達里岡。四貝

勒引右翼兵出其上。乘高擊之。綖軍殊死戰。大貝勒又引左翼兵出其西。冒杜松軍旗幟。被其衣甲。給入綖營。大呼格殺軍。遂潰。綖退入後軍。未及陣。爲我所乘。力戰死。其康應乾步兵合朝鮮兵二萬營富察之野。方戰。大風走石揚沙塵。敵營目不得開。火器皆反擊我軍。乘勢

衝入其壘應乾大敗遁去朝鮮副元帥姜功烈遂以朝鮮餘兵五千降是役明傾天下之力盡徵宿將猛士及朝鮮葉赫精銳同日深入使我不能兼顧我軍不過四五萬并力破其一路閱五日而三路皆破士卒僅損數百人盡獲其駝馬甲仗礮車軍實數百萬明與我

朝之興亡肇於是戰夏四月遂攻開原

開原城在瀋陽北二百十五里

馬林敗後尙不知斂兵保城盡出陣四門外我兵先敗其東門外兵兵走爭入城填擁于闕我兵奪門逐北而三面攻城之雲梯已蟻傳而上城上守兵少皆潰其三門外兵欲遁爲我軍扼其濠不得渡殲焉籍所俘三日

舉之不盡以天暑不復還都卽休士馬于界藩城秋七

月克鐵嶺

在開原南六十里

八月遂滅葉赫于是語言相同之

國盡爲我有疆域西至遼南至朝鮮東至海北抵黑龍

江明達經略楊鎬治罪以熊廷弼代之時遼瀋大震諸

城堡軍民盡竄數百里無人迹中外謂必無遼廷弼兼

程冒雪徧閱形勢招流移繕守具簡士馬肅軍令主固

守不浪戰集兵十八萬分布遼陽清河撫順柴河三岔

鎮江諸口小警自禦大警互援更選精銳爲游徼乘間

掠零騎擾耕牧更番迭出以俟窺會 大清亦按兵

不攻者歲餘而明臣忌廷弼者爭劾其不戰廷弼乞罷

以袁應泰代之應泰吏事敏練然非將材也會蒙古諸部大饑多入塞乞食應泰言不急收之且爲敵有招降數萬分處遼瀋二城議者多言收降太濫恐間諜雜其中禍且叵測宜徙之他地應泰不聽降人多占民居婦女遼人憤怒

大清又厚撫遼人之往來我地者于

是降人與遼人皆爲我耳目天命六年春攻明瀋陽距城七里而軍城外濠塹數重埋剡木立牆柵列火器楯車兵七萬乘城內外守禦甚具總兵賀世賢勇而嗜酒見偵騎數十卽率千騎來追我兵佯北誘之俄而伏發世賢且戰且卻至城下降人內應斷其濠梁不得入身

中十四矢尤世功引兵救之亦戰死城遂陷總兵童仲
揆陳策以兵來援師次渾河石砬土司秦邦屏先渡河
營橋北策仲揆統浙兵三千營橋南邦屏壘未就我兵
急攻卻復前者三邦屏戰死諸將渡河走入浙營我兵
圍之數重營中發火器多殺傷已而火藥盡短兵接我
兵萬矢環集策仲揆等猶揮刃衝突各殺十餘人乃死
是役明以萬餘人當我數萬衆雖力屈而覆爲遼左用
兵以來第一血戰我兵遂乘勝攻遼陽袁應泰盡撤奉
集咸寧諸軍并力城守引水注濠環濠列火器而自督
總兵侯世祿等出城五里迎戰我軍敗之始斂兵分陣

固守

太祖命塞其水源泄其閘口奪其橋先布楯

車護之右翼兵囊土運石壅水畢遂渡濠鏖戰殺溺無算左翼兵奮奪橋遂冒礮火登城據其一隅城中大亂民家多啟扉以待婦女亦盛飾臨門蓋降人導之也是夜明兵猶列炬拒戰達旦我右翼兵亦登城明經略袁應泰督戰城樓佩印自焚死御史張銓被執不屈死其餘逃者逃殉者殉城中民皆結采焚香乘輿迎上

鼓吹導引入夾道呼萬歲于是遼河以東堡寨營驛及海蓋金復耀諸州大小七十餘城俱下遂定議遷都遼陽遼瀋旣失明大震明帝盡謫前劾廷弼諸臣而起廷

弼于家乃建三方布置策廣寧登萊各設巡撫而經略駐山海關節制三方初廷弼之未至也廣寧巡撫王化貞先部署軍事沿遼河置六營又分戍西平鎮武柳河盤山諸要害及廷弼至言今日但宜固守廣寧若駐兵河上兵分則力弱敵輕騎潛渡破其一營則諸營并潰河上止宜游徼兵更番出入示敵不測自遼河至廣寧三百餘里稍置烽戍傳哨而大兵悉聚廣寧深濠高壘以俟化貞素驥不知兵及與廷弼議不合則益務爲大言謂不必籌登萊水師也有皮島毛文龍在不必籌士馬甲仗也有蒙古插漢助兵四十萬在不必籌芻糗也

有遼人可因之糧壺漿牛酒在不必謀鄉導也有降將
李永芳內應在不必修守備也有敵人新築遼瀋諸城
在廷弼極言遼人不可用蒙古不可恃永芳不可信廣
寧多間諜不可忽營壘城濠不可不嚴備化貞一切反
之且言願得六萬兵一舉蕩平兵部尙書張鶴鳴篤信
之無言不從廣寧兵十四萬廷弼關上無一卒徒擁經
略虛號而已至十月冰合大清將渡河邊民爭竄
張鶴鳴方集廷議欲去廷弼專任化貞而大兵已
圍西平堡化貞信中軍孫得功計盡發廣寧兵畀得功
及祖大壽往援並檄鎮武間陽之師共援西平遇

大清兵于半陽橋甫交綏得功先奔鎮武閭陽兵亦潰
總兵劉渠祁秉忠戰沒祖大壽走覺華島 大清兵

方次沙嶺不進而得功已陰爲內應譌言敵騎薄廣寧
城中大亂化貞不知所爲踰跟弃城單騎走二僕步從
遇廷弼大凌河化貞哭廷弼笑且憤乃以已所將五千
人授化貞使爲殿盡焚積聚護難民數十萬入關孫得
功迎 大清兵入廣寧化貞已竄二日矣錦州大小

凌河松山杏山右屯前屯四十餘城堡皆降大軍略地
至中左所而還乃留諸貝勒統兵守廣寧而移河西歸
降各官民於河東時天命七年正月明天啟元年也明

帝逮王化貞兼逮熊廷弼明臣袒鶴鳴化貞者且專劾
廷弼于是以王在晉經略遼東與薊督王象乾籌邊象
乾專主款蒙古以捍東陲而在晉專主守關門棄關外
欲于關外八里築重城守以兵四萬明大學士孫承宗
請自往決之抵關歷詰其謬明以承宗代在晉督師乃
議守關外寧遠覺華島相犄角

覺華島在寧遠城南十六里

時關以

外寧遠以西諸城堡悉爲蒙古所據聲言助守邊承宗
盡驅之邊外使袁崇煥築寧遠城守關外地二百餘里

天命十一年

天啟五年

承宗復命諸將分成錦州大小凌河

松杏右屯諸要害擴地復二百里幾復遼河以西舊地

承宗在關四載修復城堡數十練兵十一萬汰軍萬七千餘省度支六十八萬立車營水營造甲冑器械弓矢礮石渠答鹵楯之具各數百萬開屯五千頃寧遠迄成雄鎮時 我 大清方營都瀋陽按兵四載不攻

而明太監魏忠賢黨日夜排承宗去之以高第代高第力言關外不可守盡徹錦州右屯大小凌河松杏諸城守具將士于關內委弃米粟十餘萬死亡載道哭聲振野并欲徹寧遠前屯二城僉事道袁崇煥以死誓守不去 大清知經略易與于天命十二年天啟六年大舉西渡遼河抵寧遠大兵十三萬號二十萬越城五里橫截

山海關大路而軍崇煥偕大將滿桂等刺血書誓將士
堅壁清野以俟詰城中奸細并檄前屯山海關守將遇
寧遠將士逃至者悉斬人心始定明日大軍進攻戴楯
穴城矢石雨下不退崇煥令閩卒發西洋巨礮一發決
血渠數里傷數百人三日再攻再卻圍遂解 太祖

不懌者屢日時明關外軍餉皆海運積覺華島距寧遠
城南十六里守兵四萬營冰上鑿冰十五里爲濠衛以
楸車 太祖遣兵從冰未鑿處襲敗之又敗其島上
二營焚其舟二千及芻糧數萬而還經略高第總兵楊
麒擁兵關上不救于是明罷第麒以王之臣趙率教代

之而擢崇煥巡撫寧遠旋召還王之臣罷經略不設以
關內外專任崇煥是年八月我太祖高皇帝崩

七年

十

四貝勒立是爲太宗文皇帝

太祖每有征

伐與諸貝勒適野而謀畫地而議上馬而傳令上下等
威不甚異以五大臣議政十大臣理事無留獄無壅情
令簡而速故事無不舉臨敵七旗卻走一旗拒戰卽以
七旗佐領之丁給一旗一旗卻走七旗拒戰者亦如之
一旗內半卻走半拒戰者亦如之罪親不貸功疏不遺
令信而必故戰無不克興京內城居宗室勛戚外城居
宿衛親兵萬餘此外遠近十餘萬戶散處遼河東西無

事耕獵有事徵調戰勝分俘受賞人自爲兵人自爲饒
無養兵之費故用無不給起兵二十載而國基建又十
載而王業大定

臣源曰謹稽薩爾濟之戰 盛京通志謂以五百兵

破明兵四十萬然考明四路之師實止二十萬合朝鮮
葉赫爲二十四萬每路各六萬而薩爾濟所破乃杜松
一路耳敵軍二萬圍界藩四萬營薩爾濟而 太祖

太宗以六旗兵攻薩爾濟每旗七千五百人是以
四萬有餘之兵攻四萬之敵以二旗兵援界藩是以萬
五千兵攻二萬之敵

在山上者千四百人杜松軍破而山下萬有三千六百

後我軍皆萃于尙間厓。馬林破而後我軍皆萃于布達里岡。其留守都城者僅四千。則是八旗五萬餘人盡行。亦傾國之師矣。戰非一日。軍非一路。兵法當垂後世。烏得爲五百人破四十萬之吳詞。以疑史冊哉。恭讀

高宗純皇帝薩爾滸書事曰。爾時地之里未盈數千。兵之衆不滿數萬。惟是父子君臣同心協力。師直爲壯。何天之龍用能破明二十萬之衆。至哉典謨揚

大烈觀。耿光詔萬禩。詎惟是大白小白之乘天弧。

天角之御氣驅風雲祥燭東海也。昭陵有石馬二。曰大白小白。文皇所

御也。鎧重體豐。凡馬弗能勝。惟乘小白。日行百里。乘大白。日行五十里。又實勝寺尊藏。兩朝甲冑數人弗

能舉所遺弓壯士弗能開矢長四尺餘射及二百步外
中必疊雙明季每日暮望東北方紅光燭天或謂塞外
燒荒或占主旱不知
乃我朝東興之祥

開國龍興記三

太宗文皇帝天聰元年

時年三十有八

明天啟七年也明遼東

巡撫袁崇煥將覘我虛實遣使同李刺麻來弔並賀

卽位

太宗文皇帝亦以書報之往復者再是

爲我

朝與明議和議戰之始其書略言昔我師旣

克廣寧時諸貝勒將帥咸請入山海關我

皇考以

昔日遼金元不居其國而入處漢地易世之後皆成漢

俗因欲畫山海關以西漢人制之遼河以東我制之滿

漢各自爲國故軍未入關而返原無爭主中原之心也

如欲畫疆定約修好息兵其尊卑稱謂我當讓爾主一

格爾諸臣讓我一格其歲幣我以東珠蔭貂明以金銀
緞布各若干如約初關外四城袤延二百里北負山南
瀕海廣四十里耳屯兵六萬艱於轉餉故孫承宗復錦
州中屯大凌河諸城開屯足食自高第盡撤去寧遠無
外障崇煥陰欲復之乘我有事朝鮮陽遣使議和以暇
修復舊疆爲屯守計我朝知其情故和議卒不得
要領會朝鮮兵凱旋夏五月遂攻明先趨大凌河城城
王未竣守兵皆遁惟錦州守備已固總兵趙率教懲渾
河瀋陽之事不納潰兵我朝縱還臺堡降卒二千
城者拒之雖往返議和之使亦不令入城我軍力攻城

西隅垂克爲明三面乘陴兵鑿救所卻遂退五里而營
移擊其援兵于寧遠崇煥守城內而滿桂尤世祿背城
據濠列車營火器以拒太宗稍引退踰岡以誘之
明兵堅壘不動貝勒代善阿敏以地險皆請勿攻

太宗曰我軍攻城旣不克野戰又不克曷以張國威命
侍衛皆冠兜鍪持盾大呼馳進諸軍皆冒死衝突我貝
勒數人受創猶力戰明滿桂中數矢亦不退殺傷相當
屍滿濠塹復回攻錦州濠深濶天又暑乃毀大小凌河
二城而還我大清自起兵明軍望風潰竄無敢議
戰守議戰守自崇煥始魏忠賢猶使其黨劾崇煥不救

錦州爲暮氣崇煥力乞退以王之臣代之復議徹錦州
守寧遠會天聰二年明崇禎元年明誅魏忠賢復用崇
煥督師建議以遼人守遼土以遼土養遼人野戰旣非
所長惟有憑堅城用大礮一策守爲正戰爲奇和爲輔
數遣使來議款

太宗答以遼東土地天授不可還

惟許易尊號稱汗不用國寶令明造印給我議仍不決

天聰三年冬

崇禎二年

大舉伐明以蒙古兵爲嚮導兵十餘

萬分道深入師次青城

哈喇沁部地

大貝勒代善三貝勒莽

爾古泰夜詣

御帳密諫以勞師襲遠馬疲餉匱恐

深入後敵環攻斷我歸路也力爭至夜半

太宗惡

崇煥欲去之決計由喜峰口毀邊牆入圍遵化巡撫王元雅尙汰城中兵四百其汰兵卽開城延我師陷之總兵趙率教戰死明帝命薊遼總督劉策控扼石門以防西軼我兵已趨薊州而明督師袁崇煥率祖大壽何可綱自山海關兼程入援明帝命盡統諸援軍我軍營南海子崇煥營沙河門外鏖戰互有殺傷我軍縱反間言與崇煥有成約令所獲太監知之陰縱使去明崇禎帝前疑崇煥擅殺毛文龍至是卽召崇煥入城下之獄于是祖大壽何可綱引兵萬五千走出山海關明帝乃命大同總兵滿桂爲武經略起故督師孫承宗自通州移

鎮關門大壽乃斂兵待命滿桂督步騎四萬陣永定門外嚴濠柵環以鎗礮十重我兵宵進效明兵甲裳旗幟時明援軍滿郊甸滿桂以爲援軍也黎明乘不意突衝入其營滿桂戰死生禽總兵黑雲龍麻登雲等明帝以庶吉士金聲薦擢游僧申甫爲總兵造戰車又擢庶吉士劉之綸爲兵部侍郎募義兵皆以倉卒未訓練敗死太宗不欲究武乃爲議和書分置永定門德勝門外移軍略薊而東明年正月克永平克遷安克灤州惟昌黎知縣左應選率居民并集各城潰兵登陴固守蒙古兵攻之不克命大臣達爾漢往晝夜進攻亦不克

太宗自撫寧移師四面環攻之火燎雲梯折復持柝
鑿城亦被卻而三河寶坻亦以堅守得全 詔罷攻

班師留貝勒濟爾哈朗等統兵萬人守永平其遷安灤
州遵化各留兵守三月 命二貝勒阿敏益兵五千

往守永平各城時明各路援軍二十萬以馬世龍統之
與承宗關門之軍東西犄角及是乘我大軍之歸以五
月十日先攻灤州人斫一柳立平其濠發大礮摧其堞
我守將潰圍走貝勒阿敏見明軍勢盛擁重兵屯永平
不援遂召遷安滿兵回永平盡屠城中降將兵民夜奔
城遁并檄遵化諸將同還又不嚴殿後爲明軍所襲士

卒多死。六月，至瀋陽。

太宗震怒，議罪幽禁。天聰五

年

崇禎四年

始鑄紅夷大礮，命漢軍演火器。秋，復攻大凌河。

城時，承宗已復關內四城，復理關外舊疆，欲并力先城大凌河。巡撫邱禾嘉違其節制，遂同右屯城並築。會是秋，兵部尚書梁廷棟罷代者，盡反其議，言築城非策。盡徹班軍萬四千赴薊，獨留防兵萬，僅給糧萬石。承宗議以糧散軍，委城而去，毋資敵。禾嘉又不可。八月，大清兵來攻。時半月兼築兩城，大凌雉堞僅完其半。我兵四面掘長圍，而分軍截錦州之援。九月，邱禾嘉及總兵吳襄、宋偉等步騎四萬逾小凌河而陣。

太宗分軍

爲二先率其半以進見敵陣整欲俟其移營擊之乃引還明兵四鼓趨大凌河陣于長山口距城十五里

太宗督兵三萬擊之敵仍堅陣不動乃率兩翼勁騎先衝宋偉營營中火器震天我左翼避鎗礮隨右翼後而進宋偉殊死戰營不能破我前鋒多死復麾左翼兵趨吳襄營東發大礮火箭攻之時黑雲起風從西來襄軍乘勢縱火將偏我陣忽大雨反風襄營燬先走我右翼攻宋偉營力戰至晡亦衝入其壘明軍大奔我伏兵截其歸路殲之大壽弟大弼者爲副總兵號萬人敵嘗以五百騎笑我軍于錦州又幾及御馬之腹太

宗稱爲祖二風子至是率死士百二十人能滿洲語者
易服辮髮夜突

御營于白雲山火藥偏帳起諸營

驚擾我侍衛親軍力戰黎明乃退十月大凌河援盡糧
絕殺人馬以食城中商民三萬僅存三之一我兵聲礮
揚塵詭爲援兵誘之出城敗還旣而錦州援兵四萬果
至城中間礮疑不敢出夾擊大壽遂降言妻子在錦州
請詭往內應

太宗縱之還大壽復爲明守十一月

我兵攻杏山攻中左城不克明臣劾承宗不當城大凌
河喪師辱國承宗劾邱禾嘉違令失機諸罪並自乞罷
遂罷承宗明年四月始罷邱禾嘉以楊嗣昌代之先是

明陝西大饑盜賊蜂起邊軍乏餉者應之及燕京被兵
延綏固原甘肅臨洮寧夏五鎮總兵皆以勤王入援陝
賊益不可制山西巡撫耿如杞率勁卒五千入援兵部
調守通州次日調守昌平又次日調守良鄉三日皆不
得餉士飢掠食又以不戢士逮如杞于是五千人潰歸
而晉賊又從此起至是并承宗去之東西交關明遂不
可爲矣初天啟間王象乾王在晉主款蒙古定月餉新
舊額賞及馬市歲約百萬馬市者順義王俺答裔歲進
馬五萬二千五百易銀三十二萬及崇禎初順義王裔
爲插漢部所逐因請代順義守邊求額賞而飢困無馬

可市遂請援例折價大同巡撫張宗衡力言插部衰弱無能爲不當歲耗百萬以餽飢困悖慢之虜因陳插十四可圖及圖插十四方略與象乾爭議不決天聰六年

崇禎五年

太宗滅插漢屯歸化城賜明大同陽和宣府

各邊臣書曰朕統師至此詢知爾國歲給插漢至百餘萬與其費此于無用之地曷若與我修好自當遜爾爲大國爾等亦當視我居插漢之上遂與明大同巡撫沈榮等刑白馬烏牛盟大市于張家口斬我部蒙古兵之掠明境者以徇明帝聞之逮榮治罪于是益無人敢議款者天聰七年

崇禎六年

明登州參將孔有德耿仲明以舟

師來降。又明年廣鹿島副將尙可喜來降。三人皆毛文龍部將。文龍誅後。孔耿叛。據登州。自稱都元帥及總兵官。突圍航海來歸。可喜亦收諸島衆數千。至令領火器爲一軍。孔耿爲天祐兵。可喜爲天助兵。詔諸貝勒

大臣議。征明與朝鮮插漢孰先。皆言我勁敵惟明。其朝

鮮插漢宜且置度外。山海關外寧錦各城堅守。亦可緩

圖。惟由間道深入明腹地。腹地得則外藩外郡自歸順。

天聰八年崇禎七年秋七月。復命兵四路伐明。一從尙方堡

之宣府趨應州。至大同一。由龍門口入會于宣府。一由

獨石口入會于應州。一由得勝堡入。歷大同趨朔州。又

有沿邊繞殺虎口至朔州者所向克捷九月凱旋天聰

九年

崇禎八年春

命貝勒多爾袞岳託豪格等往收插

漢部落侵掠明邊并

命多鐸率兵攻明錦州以綴

其西援之師八月多爾袞等既降插漢得其傳國璽并

由朔州毀寧武關入略代忻應懋擊斬明兵六千餘俘

獲人口牲畜七萬六千還歸化城天聰十年

崇禎九年四月

羣臣以功德隆盛恭上

尊號曰寬溫仁聖皇帝改

元崇德國號大清時

上年四十有八矣尊

太

祖曰武皇帝追王以上

四世封大貝勒代善等親

王賜異姓功臣孔有德尚可喜耿仲明及外藩蒙古各

部王爵惟朝鮮不肯推戴且有違言上將親征之

先伐明以挫其援是秋命武英郡王阿濟格等分

路逾獨石口入居庸克昌平偪燕京過保定克十二城

五十六戰皆捷俘人畜十有八萬明督師兵部尙書張

鳳翼宣大總督梁廷棟皆按兵不敢戰日服大黃藥求

死九月我兵從建昌冷口出邊明守將崔秉德請以兵

扼我歸路總監高起潛不敢進俟我兵出口二日始至

石門明亦不之罪也二年崇禎十年春太宗遂親征朝

鮮降之語具征撫朝鮮記崇德三年崇禎十一年親征

喀爾喀秋八月命睿親王多爾袞克勤郡王岳託

等兩路伐明。薊遼總督吳阿衡醢酒不設備。大兵

遂入墻子嶺及青山關。兩翼兵會于通州。至涿分八道。一沿山。一沿運河。其山河之間六道並進。明督師盧象昇與兵部尙書楊嗣昌不合。關寧重兵盡屬中官高起潛。象昇名督天下兵。實不及二萬。又令陳新甲分其半。象昇從涿州進保定。大戰慶都。互有殺傷。進至銀鹿所。部兵又潰半。以五千卒遇我兵。數萬圍三重。起潛擁重兵相去五十里不救。象昇血戰兩日。礮盡矢竭。猶手格十數人乃死。大清兵蹂躪眞定。廣平。順德。大名。至

山東臨清州。渡運河。破濟南。執德王。凡克城五十。降城

八俘人口四十六萬有奇白金百餘萬先是明山東重

兵扼德州楊嗣昌用員外張若麒議

張若麒本禮部主事希嗣昌意効黃

道周得

檄巡撫顏繼祖毋得離德州一步僉謂

大

清兵無越德州而南之理至是我兵由東昌渡運河直趨濟南濟南無備遂陷督師大學士劉宇亮與陳新甲率各鎮勤王兵惟尾後而行明年二月大清兵還

至天津衛值運河水漲輜重綿亘難渡或議乘我飽歸擊其半濟明諸將王樸曹變蛟劉光祚等相顧不敢動數日始渡畢北還明德王俘至盛京太宗卽命其

上書明崇禎帝請和仍不報初睿親王等軍之入明邊

也

太宗亦親攻明錦州中後所以牽制之崇德四

年春圍杏山礮破其臺毀其堞明副將金鳳乘夜樹柵築土黎明復攻不能入雲梯先登者陷沒三路穴城亦被卻乃解圍九月遣兵往略明錦州寧遠擾其秋穫明

年崇禎十年

遣兵城義州屯田偪明關外諸城擾其春耕

寧遠總兵金鳳戰死明薊遼總督洪承疇言金鳳始以三千孤軍守杏山抗勅敵及擢大將擁萬兵反敗歿此事權專不專號令一不一之效也

上以大軍屢入

塞不得明尺寸地皆由山海關阻隔而欲取關非先取

關外四城不可崇德六年

崇禎十年

命睿親王多爾袞肅

親王豪格等攻錦州以必克爲期多爾袞等離城三十里而營又私遣甲士更番還家致敵芻糧樵采出入無忌上震怒詰責命鄭親王濟爾哈朗往代偏城築長圍困之并扼松杏援師之路其守外城蒙古知我師志在必克懼而約降與祖大壽兵格鬪我軍乘之繼而上遂克其郭降蒙古數千口祖大弼又病不能軍錦州告急夏五月明薊遼總督洪承疇巡撫邱民仰率王樸唐通曹變蛟吳三桂白廣恩馬科王廷臣楊國柱八總兵軍十三萬馬四萬集寧遠芻糧支一歲祖大壽遣卒自錦州逸出傳語毋浪戰但以車營徐偏出境承疇亦

議以兵護糧餉輜重由杏山輸松山再由松山輸錦州

松山錦州城南十八里杏山錦州城西南四十里步步立營以守爲戰而兵部

尙書陳新甲以師久餉匱遣職方司郎中張若麒赴軍

若麒素狂躁日夜報捷并請密勅趣戰承疇遂不敢堅

持前議留糧芻于寧遠杏山及塔山外之筆架岡

塔山錦州

城西南六十里而以兵六萬先進諸軍繼之騎兵環松山三面

而步兵據城北之乳峰岡兩山間列七營衛以長濠八

月太宗聞之親統大軍赴援晝夜兼程六日而至

自山至海橫塹大路斷其杏山之餉并分軍敗其塔山

護餉之兵遂獲筆架岡積粟明兵旣失餉道又不敢發

戰遂徹其步兵七營背松山城而陣夜屢突營不利

太宗知明軍自寧遠至松山所賞行糧不過五六日勢必走乃夜布諸軍潛伏塔山杏山小凌河諸要隘邀其去路又益兵守筆架岡之糧而親督大軍橫列

以待次夜初更吳三桂等六總兵果更番殿後嚴陣迭退而王樸所部先遁諸軍無復行列爭奔杏山我追兵躡其後伏兵邀其前明兵彌山亘野且戰且走六鎮兵皆潰入杏山曹變蛟亦徹兵入松山城與洪承疇邱民仰王廷臣困守突圍五次皆不遂變蛟又直突御營中創遁還上又料明杏山兵必奔寧遠復遣精

兵一伏高橋一伏桑噶爾齋堡俟杏山軍出扼險掩殺
王樸吳三桂等僅以身免張若麒匿漁舟由海道遁還
後降于流賊又降于我朝先後殲敵兵五萬三千七百八十餘獲駝
馬甲冑礮械以數萬計自杏山南至塔山死傷狼籍海
中浮屍如鴈鴛我軍昏夜中僅傷十人于是松山城
中餉援皆絕我軍復掘外圍困之九月 駕還 盛

京明侍郎沈廷揚由天津海運糧餉至松山濟師始延
數月崇德七年崇禎十五年二月松山副將夏承德密送質

子爲內應我軍入城生禽洪承疇祖大樂等送 盛

京邱民仰曹變蛟王廷臣等戰死縱祖大樂還錦州錦

州被圍一載間松山失亦降旋克塔山杏山于是明國
大震崇禎帝祈籤于奉先殿始決和議遣官至錦州所
資乃敕諭兵部尙書陳新甲之詞非國書也 太宗

不報明復遣兵部員外馬紹愉副將周維墉及僧性容
等赴寧遠申前議五月至 盛京 召見宴餞如

禮報崇禎帝書時明帝尙諱和惟與陳新甲密議之及
是語泄外廷交章劾奏新甲獲譴于是和議遂絕明白
流寇未起以前止可議守而必責其戰流寇大熾以後
并不能守而我 朝尙望其和漢軍副都統祖可法

言講和之事利于明而不利于我使明得陰修戰備而

我 國反習逸忘勞若以明地廣民衆爲疑則流寇
四起中原民已成敵國但斷其通津餉運西山煤路則
燕都立困先取山海關則關外諸城唾手可得此攻心
扼吭之法也十月復 命貝勒阿巴泰等伐明左翼

軍自界山毀邊牆入右翼自鴈門關黃崖口入會于薊
州直抵山東兗州而還克府三州十八縣六十七走魯
王俘人民三十六萬九千口牲畜五十五萬有奇金銀
珠緞稱是大兵自去冬入邊數月以來兵不解甲馬不
釋鞍乃以八年三月初入莒州沐士馬時春草被山解
鞍縱牧南北驛路不遇我軍一騎或妄傳已出塞及四

月大兵反自南來起天津至涿鹿車駝亘三百餘里渡
蘆溝橋兼旬未畢時勤王四鎮劉澤清唐通周遇吉黃
得功勁兵猛將皆集通州督師大學士周延儒無敢一
議邀遏惟終日閉城報捷及大軍已度險將出邊唐通
白廣恩等始合兵邀拒于密雲螺山潰還而山海關內
外並建二總督又設昌平保定二總督千里之內有督
臣四又有寧遠永平順天密雲天津保定六巡撫寧遠
山海中協西協昌平通州天津保定八總兵星羅棋布
事權不一又有監督太監握重兵牽制之至是薊遼總
督趙光祚關外督師范志完大學士督師周延儒先後

誅死自萬歷後歲徵遼餉六百六十萬崇禎中復加剿
餉二百八十萬練餉七百二十萬先後共增賦千有六
百七十萬竭天下兵餉大半以事關東而中原盜賊蠡
起或百萬或數十萬所至破城陷藩東西交鬪明之諸
臣于流寇或多議撫而于我朝反諱議和又不圖

所以戰守盈廷築室蠲蠲羹沸我諸王將帥爭請直取
燕京而太宗尙遲之又久以待天時崇德八年崇禎

十六年八月太宗文皇帝崩景命遂集于我世

祖章皇帝

臣源曰謹稽乾隆四十三年

高宗純皇帝巡狩

盛京諭言山海關京東天險明代重兵守此以防我朝而大軍每從喜峰居庸問道內襲如入無人之境然終有山海關控扼其間則內外聲勢不接卽入其他口而彼得撓我後路故貝勒阿敏奔灤永遵遷四城而歸太宗雖怒遣之而自此遂不親統大軍入口

所克山東直隸郡邑輒不守而去皆由山海關阻隔之故乃不旋踵而吳三桂請師討賊反開關以延我師之入在德不在險詎不信哉臣源又按大軍至山東時亦不用扼運河之策者明糧艘夏北秋南與我師冬至春歸之期不相值若留軍盛夏又有暑雨蒸溽士馬痘疫

師老敵乘之慮故用兵有小天時有大天時小天時以
決利鈍大天時以決興亡慎其小時則軍出萬全俟其
大時則一戎衣而成帝業

開國龍興記四

世祖章皇帝順治元年明崇禎十有七年甲申也四月
命攝政睿親王爲奉命大將軍率師收明山海關
外地并經略中原先是三月初明以流寇內逼用薊遼
總督王永吉議盡弃關外四城召寧遠總兵平西伯吳
三桂統邊兵入關衛京師三桂徙寧遠兵民五十萬衆
而西日行數十里十六日入關二十日至豐潤聞燕京
已陷不敢前又聞家口被掠于賊而賊已遣降將唐通
白廣恩率兵二萬東攻灤州向山海關乃回兵擊潰賊
衆降其兵八千急遣使我朝乞師討賊時我攝政

王師尙未至寧遠得三桂書卽日進兵師次連山復得三桂趣兵之請遂踰寧遠次沙河距山海關外十里時流賊李白成自將精銳二十萬東擊三桂又分二萬騎繞出關外夾攻攝政王令英王阿濟格豫王多鐸各將萬騎由東西水關分道入而自以大兵繼進敗賊前鋒數百騎于關外一片石三桂率親兵五百出謁攝政王卽軍中雍髮盟誓王命三桂兵各白布繫肩爲號四月二十有一日三桂開關出擊嘗賊殺傷相當翌日大戰賊衆自北山橫亘至海我兩軍對賊而陣三桂軍其右我軍其左尙不及賊陣之半王以流寇勦敵不可輕乃

命三桂軍先戰衝其中。敗去而我軍蓄銳以待。是日自成挾明太子諸王于西山。我攝政王率英豫二王于東山。各立馬觀戰。洪承疇祖大壽孔有德尙可喜畢從賊。張兩翼圍三桂數重。三桂軍人人血戰衝盪數十合。呼聲震海嶠。及午塵沙山起。怒若雷鳴。兵賊不辨。我軍大呼者三。風止。英豫二王率鐵騎二萬橫躍入陣。所向洞札摧陷。俄塵開。賊見甲而辮髮者。驚曰。滿洲兵也。陣遂動。自成磨蓋先走。賊衆望之。遂土崩逐北四十里。斬賊數萬。下令關內兵民皆薙髮。命吳三桂以步騎二萬前驅追賊。自成奔至永平。使降臣王則堯張若麒詣三桂軍。

議和偽還太子非眞也。三桂益進兵。自成走京師。屠三桂家。尸明諸王于市。焚宮殿。載輜重西遁。攝政王檄三桂及英豫二王兼程追賊。勿入京。五月朔。渡蘆溝。次日及賊慶都。賊盡其輜重先行。以精兵拒戰。適狂風簸沙。賊旌旗皆折。復大敗之。賊走山西。班師。攝政王五月朔入燕京。奏捷。盛京頒示朝鮮蒙古。時京北京東諸府皆降。惟京南保定大名眞定等府潰。賊土寇蠭起。而山東河南聞自成敗竄。諸州縣並殺其僞防禦使牧令。復爲明明福王由榔方擁立南京。改元宏光。無一官一兵至河北。亦皆擅于土寇。六月遣肅親王豪格往定山東。

河南遣都統葉臣等往定山西。又命戶部侍郎王永鰲招諭之。永鰲言：重兵萃京畿，需餽不億，請擇畿南及山東河南要地，分兵控鎮。俟秋高，進剿闖賊，就近調度。可北扼潼關，南扼武關，從之。攝政王致書於明督師大學士史可法，可法報書不屈。明福王亦遣其臣左懋第、陳洪範具書幣來通聘，并海運米十萬石，銀五萬兩犒吳三桂軍，并卻之。九月，世祖章皇帝車駕發盛京，十月朔，定都燕，祭告天地社稷。奉太祖太宗神主入太廟。頒詔中外，大赦，盡除明季加派稅餉。厰衛變政，其文臣衣冠暫從明制。上御皇極門，授

吳三桂平西王勅印尋議大舉討流賊恐其阻關固守又恐其西竄甘肅乃以英親王阿濟格爲靖遠大將軍同三桂尙可喜等由大同邊外會諸蒙古兵赴榆林延安出陝西之背又以豫親王多鐸爲定國大將軍率孔有德等由河南夾攻潼關約會于西安是冬葉臣等兵出固關進平三晉所至迎降禽僞伯陳永福于太原敗僞總兵李過于大同巡撫馬國柱進剿汾州平陽之賊山西悉平直隸巡撫衛國允沈文奎先後削平真定大名順德廣平山寨之寇繼而始定肅親王駐軍濟南遣兵破青州斬賊趙應元應元前降復叛殺侍郎王永鰲

者也。又平滿家洞之賊，地界四縣，周二三百里，巢窟二百五十有奇，焚斂無虛日。肅王遣尚書爾格等擣之。明年，饒餘郡王阿巴泰繼攻各穴，隨破隨塞，尚餘二大洞，爲賊巢。巢重關夾隧，伏火器，峙糧糗，絕其汲道，始破之。山東諸郡悉置官吏，其豫親王之軍。自十二月渡孟津，走賊將張有聲於洛陽，收沿河寨堡，進陝州，襲破賊將張有曾于靈寶，盡收關外地。李自成盛兵潼關，遣其將劉宗敏據山爲陣，我軍大礮未至，遣前鋒三千距關三十里據堡爲營，宗敏圍之。三日，夜人馬寂然，賊莫測所以，不敢擊。明年正月，我師大至，自成亦出關逆戰，三千

騎從中起表裏夾攻大破之復敗其連夜劫營之賊會大礮至遂進偪潼關賊鑿重濠以拒發大礮遙擊之山谷中不容大衆賊以精騎數百伏隘橫衝我脅又出銳卒繞出我後皆爲我奇兵及殿後兵所破而是時英王及三桂邊外軍已從保德州結筏渡河入綏德走李錦克延安鄜州偪西安之北自成腹背受敵遂弃關遁回西安守關賊馬世堯以衆七千降遂克潼關越二日至西安賊已先五日焚宮室由藍田出武關走湖廣命豫王移師征江南以流賊付英王及三桂追剿時賊尙三十餘萬聲言欲取南京我兵水陸躡其後于江北

之鄧州承天德安江南之武昌九江破賊者七閏六月

賊晨起離其大隊以十餘騎入禱九宮山

山在武昌府通山縣之南

九十為鄉民所鋤餘眾尙二十餘萬降明湖廣總督何

騰蛟而豫王南下之師三月自河南一出虎牢關一出

龍門關一出南陽會于歸德府時開封汝寧間列寨百

數劉洪起長之南陽列寨數十蕭應訓長之洛陽列寨

亦數十李際遇長之各擁兵四五萬而洪起最忠勇屢

殄流寇明河南巡按御史陳潛夫請福王子洪起挂印

將軍號召河南北不許山東兵部職方主事凌駟募兵

復臨清濟寧與德州諸生謝陞義旅相應

謝陞者起兵德州南中訛

傳以爲故相
謝陞者也

請收輯山東通好南北而設水師于膠州

對岸之廟灣援青齊義旅時明大學士馬士英方以江北分四鎮劉澤清駐淮安高傑駐瓜州黃得功駐儀徵劉良佐駐壽春議畫淮而守無遑遠略又使降賊之故兵部尙書張縉彥總督河南山東軍務而使其姻婭越其杰巡撫河南并召還陳潛夫諸將解體及大兵南下于是明睢州總兵許定國誘殺高傑遂與李際遇先後納款我軍爲鄉導河南諸郡邑望風悉下惟劉洪起力戰汝寧間及七月始爲內大臣和洛輝所破斬明諸鎮中黃得功最忠勇而左良玉與高傑兵最強良玉爲何

騰蛟袁繼咸所用高傑爲史可法所用皆革面自馬士英阮大鍼用事左良玉與黃得功之兵闕于西高傑與許定國之兵闕于北我兵二道并進一出淮北一出淮南如入無人之境出淮北者爲都統準塔山東之兵五月降高傑部將李成棟于徐州敗劉澤清兵于宿遷師次清河澤清率步兵四萬船千餘據黃淮清三河口我兵以礮遙毀其戰艦相持對岸而分兵繞渡上游擊敗其步騎合追至淮安澤清及總漕田仰皆遁入海我兵徇通州泰州皆下其出淮南者豫王自將之由歸德趨泗州明淮河守將李際遇焚浮橋遁我兵遂夜渡淮明

督師大學士史可法自去冬督所部標兵三萬次河上
為高傑聲援及高傑死復收撫傑所部兵十餘萬于揚
州至是將督以援泗至中途泗州已失守淮揚告急福
王方手書趣其入援拒左良玉及浦口始命回揚則所
部防河之兵皆在外檄之大半不至史可法閣標三萬
總兵張天祿劉肇
基副將張士儀參將沈通明監軍道高岐鳳及忠貫營
總兵李棲鳳等各分汛地皆可法閣標所轄在各鎮之
外去冬出師防守黃河南岸又遣總兵劉肇基援海州
援邳宿皆有功故標兵皆在外至是檄回揚州張天祿
不至棲鳳兵四千暫至揚旋拔營而高傑部下兵十餘
出走皆由馬左交關人心解體也
萬以久無統帥且謫傳許定國引大兵報讎或北走通
泰或南赴瓜儀揚城一空初傑死眾無所屬福王命可
法代統其軍俟傑子高元爵

長而援之。可法兼請以傑甥李本深爲提督。轄衆事已大定。馬士英聞可法大得傑軍心。忌甚。別命其私人衛胤文都督傑營。并斬李本深。提督之命。于是所部皆奔汎地。潰還揚州。旋潰出走。又前此援泗之甲仗火藥糧餉數十萬。皆猝不得返揚。可法獨督總兵劉肇基等兵二萬。及官吏士民分陴拒守。我豫王大軍自天長六合水陸并進。距揚州二十里而營。以大礮未至也。劉肇基請乘我不備。背城一戰。可法謂野戰不如馮城。豫王貽書招降。再四。可法不應。拒守七晝夜。發礮傷城外軍數百。豫王怒。令精兵大礮專攻城西北隅。崩聲如雷。守陴不退。我兵踐城下。積尸而登。遂陷。肇基率士巷戰。殺傷千餘。可法死之。我兵留十日屠之而南。

五月初師至揚子江明總兵鄭鴻逵以水師守南岸侍郎楊文驄墻金山以禦矢礮時高傑潰兵欲渡江者爲岸兵所拒皆降于我隔江相持三日編巨筏夜置燈火放之中流明軍礮擊之日報虛捷我兵乘霧夜渡數百騎據阜鳴螺樹幟防江兵倉猝潰遁大軍方舟畢濟留左翼軍據瓜州北岸爲聲援遂陷鎮江自丹陽句容抵南京營于郊壇之北而福王已先三日率太監宮人夜開通濟門走蕪湖馬士英阮大鍼亦率親兵數千由漂水走杭州矣明諸勛戚文武大臣迎降豫親王駐軍城外十日始入城斬滿洲掠物者八人以徇駐軍東北城

其中西南三城居民毋徙并祠史可法以旌其忠降明

廣昌伯劉良佐兵十萬高傑舊部兵十三萬

傑子高元爵及部將

李本深李成棟李樓鳳等率之以降

遣貝勒尼堪貝子屯齊等追福王于

蕪湖明靖南侯黃得功中流矢死總兵田雄馬得功擁

福王出降江南悉定而英王上游追流寇之兵亦至九

江東流縣明故寧南侯左良王子夢庚兵十萬降于英

王軍前

九江督師袁繼成被執不屈死

英王遣章天于偕降將金聲桓

徇江西又遣兵分守荊州武昌盡收湖北班師豫王遣

降御史王懷黃家鼎

等赴安慶寧國常蘇松江

各府收降冊并發兵三千以往

楊文驄襲殺黃家鼎于蘇州走浙江後死于閩

難

六月又分大兵之半令貝勒博洛等追明潞王常潞于杭州沿途徇所過郡邑并分兵徇松江太倉下之明大學士馬士英總兵方國安等迎戰敗走渡錢塘江我軍營于江岸杭人見之謂潮至必沒旣而潮三日不至咸賊爲神開門降并降淮王常清又取周王家屬于湖州浙西亦略定豫王承制改南京爲江南省其郡邑以城降者卽使爲守奏授江寧安慶巡撫以下官三百七十三人七月俘福王凱旋 命多羅貝勒勒克德渾爲平南大將軍同都統葉臣等鎮守江南下令海內薙髮易衣冠 命內院大學士洪承疇總督軍務招撫

南方遣八旗兵駐防順德濟南德州臨清徐州潞安平
陽蒲州八城每城各一旗是夏六月明唐王聿鍵稱帝
于福建明魯王朱以海監國于紹興唐王者明太祖九
世孫也世封南陽崇禎九年起兵勤王廢爲庶人幽鳳
陽高墻福王立赦出當徙廣西行至杭州而南都陷鄭
鴻逵奉之入閩旋聞杭州降明南安伯鄭芝龍禮部尙
書黃道周戶部主事蘇觀生等勸進遂改元隆武進芝
龍鴻逵等爲侯道周觀生大學士是爲福建之師魯王
者明太祖十世孫也世封兗州北都之變諸王皆南下
宏光立移往台州次年六月潞王以杭州降明故兵部

尙書張國維朱大興起兵金華給事中熊汝霖孫嘉績
起兵紹興吏部員外錢肅樂行人張煌言諸生王翊起
兵寧波定海總兵王之仁石浦游擊張名振以海上兵
應之殺招撫使迎請魯王監國盡驅錢塘西岸之船泊
東岸列兵江上畫地戍守西取富陽以扼我上游東由
海道以潛通太湖是爲浙東之師又是時薙髮令下蘇
州巡撫上國寶松江提督吳兆勝吳松總兵李成棟皆
以降將乘勢騷虐于是明故給事中陳子龍故總督沈
猶龍故吏部主事夏允彝約水師總兵黃蜚吳志葵起
兵松江兵部主事吳易舉人孫兆奎起兵吳江行人盧

象觀

弟象昇

奉宗室子瑞昌王盛瀝起兵宜興中書葛麟

及主事王期昇奉宗室子通城王盛澂起兵太湖主事
荆本徹員外郎沈廷揚起兵崇明副總兵王佐才起兵
崑山通政使侯峒曾進士黃淳耀起兵嘉定吏部尙書
徐石麒平湖總兵陳梧等起兵嘉興典史閻應元陳明
遇起兵江陰僉都御史金聲偕邱祖德尹民興吳應箕
起兵徽州寧國並通表唐王遙受其除拜或近受監國
魯王節制揭竿裂裳十餘萬是爲上下江士民之師降
將金聲桓奉命招撫江西所至屠殺立威于是明益王
朱由本據建昌永寧王朱慈炎據撫州故兵部侍郎楊

廷麟據贛州各招五嶺峒蠻數萬以抗大兵是爲江西之師時我大清下金陵下淮安兵各數萬又收明

降兵間擇驍悍薙髮入伍合十餘萬半屯金陵經略洪承疇及駐防侍郎巴山等將之半屯杭州貝勒等將之又分遣招撫侍郎李延齡駐防蘇州而降將吳兆勝李成棟分防沿海及民兵四起聲勢中斷雖烏合無紀律無甲仗糧饟然不先清江左則浙閩未可鼓行而南也閏六月吳志葵率海上軍由泖湖進犯蘇州而黃蜚以太湖軍會之時城中驍騎僅千餘李延齡土國寶聚屯府學宮登盤門塔以望外兵使百餘騎遠城外各張幟

爲江寧援兵志葵前鋒數百斬胥門入長驅四五里不見一敵忽勁騎突山截擊殲之城外軍轟然引退我軍急閉城嚴督薙髮違者斬不數日城中髮皆薙卽驅之登陴內應旣絕外攻遂潰七月貝勒勒克德渾自江寧引兵而南分遣都統馬喇希恩格圖敗黃蜚戰艦于常州敗王佐才之兵于崑山宜興常熟悉下遣降將劉良佐圍江陰而李成棟亦破崇明屠嘉定合吳兆勝軍邀蜚志葵兵于吳松江與蘇州江寧軍夾攻于春申浦潮落風火烈明兵舟重膠淖燬焉禽蜚志葵進圍松江冒蜚軍帕首入其城陷之

沈猶龍死惟子龍脫免逾二年復糾吳兆勝使叛應張名振沈

名揚于崇明事泄被執其宜興溧陽之兵盧象觀以七死別詳東南靖海記

月率衆二萬窺江寧洪承疇先捕誅內應象觀軍至我軍佯舉火神策門爲號而分軍先出太平朝陽二門旋啟神策門出鐵騎衝之外軍賊敗禽瑞昌王于茅山象觀收殘卒亡入太湖復與葛麟王期昇營西山居民苦期昇兵騷虐潛引我水師提督吳兆勝攻之火其舟期昇遁去我軍萃于象觀葛麟引舟救之皆燬于火期昇遁至

福建謁唐王大學士路振飛劾其在大湖派餉苛虐罷之葛麟與盧象觀黃淳耀同年勇而知兵臨陣揮矛如風箭悉隆水累惟太湖吳易一軍江陰閻應元一軍有

紀律尙負固吳易軍嘗以七月敗嘉興總兵李遇春五

十四艘于平望復伏兵蘆岸敗提督吳兆勝軍奪舟二十與浙東兵相應和閩應元固守江陰兩月餘屢卻劉良佐李成棟之攻至是貝勒博託俘潞王北上留貝勒勒克德渾與浙閩總督張存仁守杭州自率凱旋師略地而北復嘉興府分兵復嘉善平湖諸邑振旅至吳江與兆勝軍合盡斷諸港走路乘大雨蹙吳易軍殲之進圍江陰晝夜礮攻會大雨城崩矢石盡屠其城而徽州寧國則承疇遣都統葉臣總兵張天祿攻之時金聲以徽寧四塞天險各山置十三營守以十三副將惟績溪一面當衝自守之而重兵扼叢山關我兵攻關兩月不

下乃瞞土人鄉導由旌德新嶺間道入潰其守兵十餘寨遂薄績溪城下金聲晝夜拒戰秋九月降臣黃澍未薙髮服故衣冠詭稱援兵入績溪金聲啟城納之遂爲內應陷焉是時禁旅不能徧及降將武夫乘機煽虐所至地毛如洗惟張天祿故吏可法部將尙有承平節制營徽州山上嚴戒軍士入城次春淫雨浹旬父老因請天祿

堅

不下山與三軍暴露徽人感泣事聞有

詔嘉獎洪承疇復遣總兵馬進功禽樊山王常米于潛山禽高安王常洪于婺源金聲桓亦遣其部將王體忠復建昌王得仁復撫州益王等敗竄各郡邑皆復

上下江略定。是秋浙督張存仁奏言。邇者薙髮令下。民心創賊。復萌梗化。急宜開科取士。減賦蠲逋。以收人心。安反側。并劾吳兆勝。李成棟。縱兵擾民。激變之罪。采擇施行。十月。貝勒勒克德渾。自杭回軍江寧。十二月。移征湖廣。順治三年正月。詔肅親王豪格爲靖遠大將。

軍同平西王吳三桂等。征張獻忠于四川。貝勒博託爲征南大將軍。偕都統圖賴。貝子屯齊。率師征浙東。福建。肅王以三月至西安。時明舊副總兵孫守法。鄖陽總兵王光恩。固原副將武大定。賀珍等。起兵興安。漢中。屢破流賊。遂陷鳳翔。圍西安。受唐王封伯爵。關中響應。總督

孟喬芳都統和洛輝屢敗其衆復渭南蒲城武功同州至是肅王遣兵分剿邠州慶陽延安之寇五月進軍漢中破賀珍等于雞頭關是冬進征四川時賊張獻忠使其將劉進忠守保寧進忠迎降于我軍賊不知也王師突襲獻忠于西充殲之分兵破賊營百有三十四川略定其浙東之師貝勒博託以三月至杭州時方國安潰兵渡江馬士英阮大鍼亦入其軍國安與鄭芝龍皆士英門下也合疏薦士英于唐王魯王皆被拒不納士英大鍼遂鼓國安使與諸義兵爲難又鼓其斬唐藩犒軍之使于是通國水火初以方國安王之仁宿將舉浙東

營衛兵俱隸之。又以浙東三府地丁正餉六十餘萬盡給兩軍。其民兵則取諸義餉。國安并義餉擅之。民兵無食。南疆逸史曰：初浙東起義，熊汝霖、孫嘉績皆書生，不知調度，乃迎方國安王之仁，授之軍政。而孫熊所自統，不過烏合農丐千百而已。二人兵既盛，復爭餉。因建分地分餉之議，謂某地正兵支某邑正餉，某邑義兵支某邑義餉。方王譁爭不決。戶部主事董守諭駁之曰：義餉有名無實，一則難爲繼，二則無筭庫。請一切稅供悉歸戶部計兵而後授餉。覈地之遠近酌給之。後先則兵不絀于食而爭端息。方王雖不從，然議正無以難也。按此與史可法悔四鎮分地之失正同一轍。閩粵兵餉盡授鄭氏，其失亦同。皆可爲倉卒舉事之鑒。三月

大兵臨錢唐。江張國維王之仁乘東南風拒戰。我兵觸之舟多碎。國維乘間渡江犯杭城，不克而退。夏四月，我軍隔江礮壞方國安營。竈國安卽擁兵數萬遁。挾魯王

自紹興奔台州。惟諸將兵尙乘江守江廣十餘里。大軍難之。會夏旱水涸沙漲。有汐無潮。試涉僅及馬腹。六月朔。我士馬數萬。自上游浮濟。若揭厲然。列成駢潰。馬阮嗾國安使執監國以獻。監國脫走航海。王之仁沉其家。而自歸死江寧。紹興寧波溫台悉下。惟朱大典守金華。張國維守義烏。我師破義烏。斬張國維。八月。明臣阮大鍼知金華。城東南隅土新築未堅。導大兵礮攻破屠之。旋禽馬士英與國安。大鍼並伏誅。進破衢州。禽蜀王樂安王等。浙東略定。遂進征福建。初。唐王之立于鄭氏也。閩粵兵饒盡歸其掌握。唐王奮志有爲。而令不行于下。

乃遣其大學士黃道周出關募兵徒手號召無所濟旋
敗死婺源而湖廣總督何騰蛟領所部兵三萬屯長沙
繼撫左良玉舊部馬進忠王允成衆數萬于岳州又降
李自成舊部李錦高一功郝永忠等衆十餘萬于常德
于是左兵闖兵皆歸騰蛟麾下驟增兵數十萬自成又
伏殛唐王大喜告廟進騰蛟大學士封定興伯堵胤錫
右副都御史總制其軍李錦賜名赤心高一功自成妻弟賜名必正郝永忠卽郝搖旗
騰蛟部置降卒參以舊軍題授張光壁黃朝選劉承胤
曹志建董英五人騰蛟舊部馬進忠王允成二人良王部將李錦郝永
忠袁宗第王進才馬士秀盧鼎六人皆闖部將並總兵官分鎮

湖南北與我武昌荊州大軍相持所謂十三鎮也按閩部亦

有十三家營與此各別又按騰蛟起兵與浙粵迥不同

兵餉皆在掌握宜先于各部精簡驍銳百中抽一計三

十萬眾可簡三千人以爲督標如唐藩鎮之牙兵則可

以彈壓諸營指麾節制騰蛟與式耜之敗皆以無爪牙

親兵也又兵在精不在眾降賊宜汰其冗弱大半歸農

獨留三分之一合計十三鎮每鎮萬人則餉不耗而心

易齊此皆受江西自建昌撫州破滅惟楊廷麟守贛募

降馭眾之法民兵二萬峒蠻四萬又奏留廣東入衛兵數千及中書

張同做調雲南張印選胡一清入援兵五千與南昌大

兵戰屢捷兼陷吉安守之軍頗振騰蛟請唐王幸湖南

延麟請幸江西浙中諸將請幸衢州唐王以芝龍不足

恃亦欲棄閩由贛入楚倚騰蛟先遣兵部侍郎萬元吉

督師于贛遣大學士蘇觀生募兵南安芝龍使兵民數萬號唐王不得行至是年夏杭州大兵渡浙東江西降將金聲桓克吉安撫州鄭彩鄭鴻達棄廣信奔入關楊廷麟萬元吉退守贛六月我兵已定浙東走魯王芝龍陰受洪承疇約款託言海寇馳還安平盡徹關隘水陸諸防仙霞嶺虛無人大兵由衢州廣信兩路長驅入斬其大學士黃鳴峻于蒲城連下建寧延平時贛已迫于我兵不及援閩何騰蛟遣郝永忠五千騎迎其主亦次韶州不進唐王奔汀州我前鋒統領努山冒明軍旗幟馳七晝夜追及之并敗其總兵姜正希援兵二萬遂執

唐王不食死芝龍詣降福州貝勒博洛俘以凱旋

詔封博洛端重郡王其江西金聲桓之師自四月破吉

安乘勝圍贛

六月明贛南巡撫李永茂遣廣東兵五千至戰于李家山圍暫解已而復合萬元吉

特變兵自固

贛兵頗恣殺掠而待雲廣二軍過嚴客兵

解體七月雲南兩廣

援師畢集諸將請戰元吉必欲待

水師水師帥故海寇

且水涸舟遲我

軍夜截諸江焚之

于是援軍皆潰及是贛州間唐王

被難合城氣索遂爲聲桓屠陷我貝勒歸自福建留重

兵守邵武遣佟養甲李成棟自漳泉進征廣東適唐王

弟聿鎮以是冬爲其故臣蘇觀生擁立廣州改元紹武

李成棟等已下惠潮用其故印移牒給報平安而潛師

從之遂襲執聿鎮及明故周益遼諸王宗室世子等二

十餘戮蘇觀生于是唐藩蕩平而桂藩之征起其魯王航海以後與鄭成功兵事相連別詳國初東南靖海記

開國龍興記五

順治三年九月

王師既定福建復遣軍由惠潮贛

州兩路攻粵明兩廣總督丁魁楚廣東巡撫瞿式耜兵部尙書呂大器湖廣總督何騰蛟巡撫堵胤錫等復擁明桂王由榔監國肇慶旋稱帝改元永歷蘇觀生與魁楚不合別立唐藩之弟旬日卽敗惟桂王擾攘西南復勤王師十餘載其始立也我廣東總兵李成棟亦下廣州分徇高雷廉進攻肇慶桂王走桂林順治四年春成棟旣克肇慶下梧州二月克平樂桂林大震丁魁楚棄桂王以輜重四十艘出岑溪降于成棟成棟殺之

而有其孥賄桂王將走依何騰蛟于湖南其大學士瞿式耜極陳桂林形勢固留不聽式耜自請留守與城存亡初在肇慶時聞廣州破式耜卽請守峽口毋遷徙而桂王聽太監王坤言不從桂王遂就總兵劉承胤于武岡以岷王府爲行宮三月成棟攻桂林式耜督參將焦璉連戰城下成棟軍不利退屯昆陽會是秋明故給事中陳邦彥起兵高州故兵部侍郎張家玉起兵東莞故大學士陳子壯起兵端州合兵襲廣以圖牽制我總督修養甲捕斬其內應檄成棟回軍東救十月圍家玉于增城家玉兵萬餘參分犄角厓高溪深我軍步騎迭進圍數重旬日破之子壯邦彥方圍廣州

不克乃伏兵邀成棟于禺珠洲乘風潮夜戰以火艇燼
我戰艦數十俄風轉成棟回舟撞之大捷遂進攻高州
斬子壯攻清遠斬邦彥廣東復定而瞿式耜乘我兵之
返遣其總兵焦璉陳邦傳破陽朔平樂下潯梧廣西復
陷其順承郡王勒克德渾湖廣之兵是春敗李錦兵于
荊州追馬進忠王進才于岳州旋奉 召還京以定
南王孔有德爲定南大將軍同平南王尙可喜靖南王
耿仲明進討三月師出岳州敗馬進才于長沙敗黃朝
宣于湘潭明督師何騰蛟率所部郝永忠退保衡州五
月孔有德進薄之斬黃朝宣遣耿仲明由水路還長沙

敗其襲城之寇復分兵四擊張光壁走寶慶堵胤錫走

永定衛李錦等潰入歸巫馬進忠王有才遁入五溪八

月合兵趨祁陽克寶慶進攻武岡劉承胤敗降

承胤挾制桂王

故湖南諸將解體及降我後明年伏誅

桂王走廣西尙可喜迨拔桂陽趨

道州敗張光壁遂克靖沅克黎平府降其岷王郡王等

二十餘十一月何騰蛟與瞿式耜會諸將于桂林畫地

分守騰蛟復視師全州督粵將焦璉演將趙印選胡一

清及己所部十三家營分路拒戰連營亘二三百里式

耜饋饟不絕我師遂引退十二月式耜迎其主還桂林

順治五年二月我師復克辰州湖南悉定聞桂林有郝

永忠營兵掠城之變騰蛟由全州還救我軍復進乘之
騰蛟式耜合兵拒戰桂林而金聲桓李成棟之變作江
西廣東皆叛附于明我軍遂退分耿尙二王軍赴江西
孔有德班師回京留總兵徐勇守長沙初金聲桓之狗
江西李成棟之狗廣東也王貝勒令遼瀋舊臣章天于
修養甲偕之聲桓左良玉部將迎降九江自請收服江西李成棟已見上篇攻城略地
皆聲桓成棟力及事平章天于巡撫江西修養甲總督
廣東而聲桓成棟仍以總兵提督受節制皆怏怏天于
及巡按董成學尤黷貨驕武士是春聲桓遂與副將王
得仁殺巡按脅巡撫迎明故大學士姜曰廣故僉都御

史揭重熙于家以江西叛李成棟聞之亦脅總督佟養
甲同時以廣東叛並蓄髮易衣冠移檄遠近通表桂王
奉永歷年號各擁兵十餘萬據上游江寧震動湖南則
騰蛟自全州遣焦璉胡一清張光壁等陷永州使王進
陷寶慶馬進忠陷常德堵胤錫率李錦敗我將線國安
安取衡州進圍長沙我長沙守將徐勇以兵三千當敵
數萬薄城下甫樹梯礮矢齊發却之敵復掘濠穿城城幾墮
流矢仆復裏創力戰日暮收兵令將士街枚守陴賊潛
勇增築木城別鑿地道出掩殺千餘又造懸樓十餘飛
矢石礮賊來往密遣兵駕小舟布滿湘江為援兵敵遂
驚潰乃急遣人迎敬四川自三年冬我肅親王剿定川
謹親王之師于湖北

西川北四年分狗川南川東五年凱旋命總兵李國英

爲巡撫以成都殘破暫駐保寧而吳三桂及都統李國翰鎮守漢中聯絡川北及姜瓖叛搖秦晉並漢中兵北赴陝明舊將李占春譚洪譚文譚誼及義勇楊大展于大海袁韜武大定等各以兵數萬分踞川南川東附桂王受封號請官吏明以錢邦芑巡撫其地而呂大器總制諸軍于是永歷有雲貴兩廣江西湖南四川七省之地移居肇慶且姜瓖猖獗于山陝鄭成功張名振出沒于閩浙皆遙相應和勢頗張幸聲桓成棟姜瓖李錦輩皆盜賊之餘無遠略

朝廷命都統譚泰爲征南大將軍同都統和洛輝自江寧赴九江會耿尙二王討江

西廣東之叛

命鄭親王濟爾哈朗順承郡王勒克

德渾會孔有德征湖南廣西之寇

命端重郡王博

洛敬謹郡王尼堪討姜瓖于大同而吳三桂李國翰分
剿陝西賊黨洪承疇仍鎮江寧經略沿海餘寇皆順治
五六年事也初聲桓叛時惟贛州不從亂贛南巡撫劉
武元總兵胡有陞副將高進庫固守而進庫故良玉部
將尤善戰聲桓得仁已陷九江欲順流突江寧而懼贛
師乘其後乃回軍攻之三月不下我江寧大兵二十萬
水陸並進已于五月復九江南康饒州長驅進擣南昌
聲桓回救聞前鋒小捷促進遂敗于七里街入城拒守

得仁以兵二萬別趨九江欲絕我餉道與南昌犄角姜曰廣固召之一日九檄得仁恚引還我都統和洛輝以舟師邀諸江口奪其戰艦東明聞見錄曰王得仁遼東人髮五色俱呼為王雜毛善戰與聲桓高進軍同隸左良玉麾下聲桓愛進庫才勇欲降之不用取攻進庫約百日救不至當獻城反南昌報警王得仁欲秘之而督軍急攻城度三日必下俟南昌之兵解圍攻贛而後出奇兵絕餉道為以逸待勞之計聲桓家在南昌不謀得仁即退師王兵見之亦退走得仁斬之不止也聲桓笑謂入南昌得仁引兵二萬直趨九江仍欲絕我餉道姜曰廣檄召之得仁曰九江據長江咽喉轉輸要路以數十萬眾深入攻城而餉道已絕非分兵攻我即撤兵東下分則力弱撤則師勞九江四面臨江城小而固可與南昌犄角夾攻豈等困守孤城坐以待斃乎姜曰廣不聽日十餘檄得仁恚曰不過欲我同死耳遂撤兵西上我舟師扼諸江口得仁轉鬪而前南昌城中亦出兵相應乃得入城自是江西郡縣復為大清所有贛州亦間出兵耿吉安南昌遂成孤注

矣。賊盡歛兵入城。南昌城三門傍山。三門臨江。我軍塋
塹其山岡。而艘截其江路。內外耗絕。以其暇。旁復郡縣。
徵收賦稅。南疆佚史曰。金王之攻贛也。留守將宋奎光
及郭天才守城。天才善戰。而奎光多機智。捕
斬內應。屢卻外攻。聲桓之盡。撤屯入城也。天才爭之不
得。自領所部川兵屯黃泥洲。奎光渡江。相地勢。請分兵
二隊。一駐生米渡。一駐市汊河。以通餉道。皆不聽。專主
堅壁。以待粵援。方大軍初至。常慮夜襲。每呼王雜毛來
也。久之。見城中無鬪志。乃掘長壕以困。東自王家渡。屬
灌城西。自雞籠山。屬生米渡。起土城。駕飛橋。自是內外
耗絕。城中斗米至八十金。我軍設南昌。令于白沙。
市設新建。令于蛟溪。徵收賦稅。安坐區之有餘。是夏

揭重熙寇汀州。爲我駐防軍所敗。而李成棟率兵度嶺。
攻贛。以援南昌之賊。我贛將高進庫復約降。以緩其師。
成棟還軍嶺上。冬十月。南昌糧盡告急。成棟復大舉攻。

贛贛師乘其初至飢疲笑敗之成棟走信豐順治六年

正月南昌西門守賊潛約內應我兵佯急攻東門而奇

兵突襲西門入明臣姜曰廣我叛將金聲桓王得仁皆

死明侍郎揭重熙傅鼎銓以肇慶援師至亦敗于程鄉

二月我師鼓行援贛李成棟師潰于信豐成棟墜水死

二賊皆滅江西復定南疆佚史及東明聞見錄曰南昌初特粵援而書記所草乞師書但

陳勝狀不告急贛州高進庫又以愚聲桓者愚成棟頓

兵數月桂王命李錦出吉安李成棟出庾嶺李錦逗留

不進成棟悉衆十餘萬赴之攻具仗械盡行多拘人夫

昇過嶺士人不免道死頗衆既抵贛日暮薄城將飢士

困而成棟氣驕無敢言者是夜城中鼓角齊鳴笑出軍

士潰竄弃械山積二月南昌既下大兵偪信豐成棟集

諸將議戰守而去者已過半成棟痛飲大醉上馬渡其

大同叛將姜瓖自去冬十二月英親王圍之瓖使其黨陷忻州朔州明廢官萬練襲踞偏關陷寧武岢嵐保德以應之劉遷略雁門關陷代州繁峙五臺以應之太原告警明參將王永強據延安我叛將劉登樓據榆林甘肅叛回丁國棟等陷河西洮岷諸州縣以應之西安告警明故官李虞夔白璋張萬全陷平陽蒲解潼關而降臣李建泰亦據太平應之遠至澤潞同時騷動六年正月敬謹郡王尼堪帥師赴太原遣兵敗賊石嶺關進克忻州睿親王出居庸關拔渾源州進薄大同諭降不從會豫親王薨京師睿英二王相繼還京端重郡王博洛

敗賊五千及姜瓖勁騎千餘于大同城北而吳三桂李國翰亦以漢中兵敗王永強于同官延綏榆林先後克復山西巡撫祝世昌同副都統洛碩亦破萬練劉清于太原城外陝西總督孟喬芳旣平肅州回賊遂與侍郎額色渡河攻蒲州平陽敗白璋張萬全殲其步騎六千于河八月英親王復出都督兵圍大同城中食盡賊黨斬瓖以降屠其軍民毀其城垣五尺是冬巽親王滿達海謙郡王瓦克達討平潞安澤州諸路誅李建泰于太平山西陝西皆定

詔晉封博洛尼堪皆親王

詔三桂回鎮漢中進復四川

詔尙可喜耿精忠由

江西進復廣東

詔明故親王郡王流落直省者令

督撫資送來京分別恩養其鎮國將軍以下編藉輸稅
毋令宵匪假藉嘯聚以取屠滅是時我鄭親王定南王
之軍以六年二月進湖南適堵胤錫所部李錦與何騰
蛟所部馬進忠爭常德進忠焚常德走武岡李錦尾之
而西各郡縣守將皆焚城遁沿途剽掠並竄桂林騰蛟
入守湘潭空城遂爲我將徐勇禽歸長沙斬之旋走堵
胤錫胡一清于衡州惟馬進忠尙踞武岡曹志建居永
州馬進才踞靖州孔有德遣兵攻曹志建于道州不克
行在陽秋曰馬蛟麟攻道州明守將曹志建戰敗遂出
白金二十萬置營中令曰斬一級者賞金一錠軍士爭

赴敵遂卻蛟麟十月有德至衡州遣兵敗寇于燕子窩而自擊

永州之寇破賊數萬曹志建踞永州龍虎關有德分路

攻圍克之降其衆五萬順治七年正月攻武岡進忠負

創走武岡靖州俱復瞿式耜使戎政總督張同敞率胡

一清趙印選王永祚諸將守全州九月我軍薄全州明

諸將退守榕江旋棄榕江走桂林趙印選前忌焦璉使

屯平樂至是又尼其援桂而倡衆潰遁十一月孔有德

入桂林城中空無人執其督師瞿式耜及其總督張同

敞東明聞見錄曰式耜以蕞爾廣西抗大兵其軍

餉所資除正賦外惟錢法鹽政屯田三事開錢局每

月得二萬金以錢易東鹽以鹽招民墾田事多掣肘又

議三分現兵以一軍守全州一軍衝鋒出奇一軍屯田

充餉而印選難之郝永忠十二月明將焦璉三路入寇

陳邦傳劫之以汜于亡全永沅三州順承郡王分路敗之章京宜爾都亦破寇

于黎平府詔鄭親王班師還京尙可喜自解贛圍

後以金王潰卒張洪曹李四營亡入閩粵山林明故臣

揚重熙傳鼎銓皆依之而粵兵亦嚴守庾嶺頓兵吉安

將一載至是明鎮將郝尙忠等密納款導我兵由間道

入庾關遂克南雄走其巡撫羅成耀桂王使成耀以兵扼南雄成耀至韶

州卽止明年我師屠南雄西上成耀奔韶七年正月克

韶州降其總兵吳六奇二月圍明總督杜永和守將范

承恩于廣州明桂王留李元胤馬吉翔守肇慶而自走

梧州時廣州城外密列礮臺城西樹木城濬三濠通海潮泥淖不能攻築長圍困之及夏暑雨蒸溽弓弦解膠士卒蒸疫幾欲退師會明援將高一功與陳邦傳自相讎殺一功西走我師敗陳邦傳馬寶兵萬餘遣吳六奇招降潮惠各鎮李元胤馬吉翔按兵肇慶不敢進十月我江西諸軍畢至尚可喜令軍士舍騎徒步涉淖冒矢石奮戰毀其木柵以礮擊西北隅軍士乘礮勢登城屠之守將范承恩郝永忠布政使袁彭年杜永和先後降桂王率李元胤走南寧盡封趙印選胡一清等爲公侯以拒我八年詔尚可喜耿繼茂鎮守廣東孔有德

鎮守廣西尙可喜等旋克復高雷廉等府禽李元增于
欽州孔有德遣總兵馬蛟麟克梧州柳州明將陳邦傳
殺焦璉以潯州來降有德復遣提督線國安總兵馬雄
全節三路進取敗趙印選胡一清克思恩南寧慶遠諸
府而吳三桂與定西將軍墨勒賚亦以八年入四川乘
楊展袁韜武大定自相仇殺順治六年韜等殺楊展明鎮守雲南總兵官王祥又
聲殺楊展之罪使余大海李占春來降二人皆爲盧名臣擊敗于涪州
劉文秀禽韜大定來降占春僞降三桂以其間復成都重慶敘州是時我
旋道復禽之
朝克復湖南江西四川廣西廣東桂王窮竄土司境旦
夕奏凱而孫可望李定國之事復作初張獻忠旣殄其

黨孫可望李定國劉文秀艾能奇

四人皆偽將軍

白文選馮雙

禮

皆偽都督

擁衆川南各數萬推可望爲長襲重慶陷遵義

入雲南使定國文秀追明叛土司沙定洲于迤東而自

赴貴陽并其黨艾能奇之兵襲貴州鎮將皮熊雲南鎮

將王祥皆奪其兵

二人皆明桂王封國公鎮守雲貴者其後皮熊助水西土司安坤起兵被

執死王祥未詳所終

又脅服張光壁馬進忠之衆定國惡其所爲

及誅沙定洲迎沐天波還雲南不復相下可望乃納款

于永厯求王封欲藉以服衆于順治六年七年屢使求

封不決及是我兵四迫桂王不得已封可望秦王定國

西寧王文秀南康王趣其出兵可望乃遣兵三千扈桂

王居安隆使文秀文選以步騎六萬分出敘州重慶以
寇成都使定國雙禮以步騎八萬由武岡出全州以寇
桂林九年春吳三桂戰劉文秀于敘州不利被圍數重
力戰突圍走綿州而都統白含貞白廣生亦敗績被禽
于重慶桂王使其大學士文安之賁勅印偏加川東諸
將譚洪等封爵文秀乘勝由嘉定犯成都圍三桂于保
寧連營十五里使張光壁軍其西王復臣軍其南氣驕
甚三桂巡城見其壁不整出精騎突光壁軍果驚潰轉
戰而南入復臣營營爲亂兵所擾亦不支文秀解圍去
三桂不追歛軍保寧旋回漢中川西川東川南復陷

四王

傳曰三桂既退劉文秀于保寧不敢追曰平生未見如此惡賊特差一著耳令如復臣言吾軍休矣初文秀乘勝長驅時復臣諫曰三桂勁敵吾軍驕矣以驕軍當勁敵懼敗請毋圍城以分兵勢但嚴陣城外出奇兵斷其餉道文秀不聽遂敗復臣戰死定國王孔有德在桂林以楚粵寇氛

日熾檄將軍續順公沈永忠以重兵扼沅州門戶令線國安馬雄全節分守南寧慶遠梧州未幾李定國陷沅靖武岡沈永忠自寶慶告急有德遣桂林兵分援沅寶則永忠已退保湘潭定國乘間襲桂林桂林城守兵少檄三鎮赴援未至而陷有德死之有德惟一子爲定國所得後被殺于雲南降將陳邦傳爲定國禽送貴州剥皮戮死以其前劫柳桂王于梧州害從官奪輜重又誘殺焦璉以降也柳州亦叛全節馬雄合軍梧州亦爲定國兵所潰廣西復

陷是冬可望率白文選以獬獬兵五萬列象陣攻辰州
我總兵徐勇戰死遂陷辰州十年 命敬謹親王尼

堪爲定遠大將軍偕貝勒屯齊進征楚粵 命洪承

疇經略湖廣雲貴兩廣自江寧移赴長沙以都統卓布
泰駐防江寧 命辰泰爲寧南靖寇大將軍鎮荊州

以李率泰總督兩廣冬十一月敬謹親王敗馬進忠于
湘潭進忠走寶慶我軍進敗李定國於衡州敬謹親王
尼堪輕騎逐北遇伏没于陣定國收軍保武岡追封尼
堪莊親王以貝勒屯齊代領其軍十一年春敗李定國
兵四萬于永州定國走攻靖沅武岡不下遂遁桂林貝

勒回軍遇孫可望兵于寶慶馮雙禮將左白文選將右
而可望建龍旗鼓吹居中大兵急攻之敗走惟雙禮軍
不動大兵引還平南將軍阿爾津亦敗文選兵于辰州
惟沅靖武岡尙未復時可望與定國隙聞其敗遣馮雙禮邀擊定國禽雙禮而釋之攻沅靖武岡不下而去可望又自將往追不意猝與大兵遇而我廣西守將線國安馬
雄等是春得尙可喜舟師以定潯梧乘定國與湖南大
兵相持盡復平樂桂林屢敗胡一清王應龍陳經猷之
衆于象州賓州招撫睿川徭獍廣西略定十一月李定
國步騎四萬攻廣東猝陷高州擾雷橫廉薄肇慶圍新
會尙可喜耿繼茂急請滿兵會剿
命都統朱瑪喇

爲靖南將軍率江寧駐防兵赴之。是年冬至十二年春，連敗定國于新會，可喜結營山巔，伏兵江隘。與朱瑪喇合兵，敗賊于珊洲。定國復悉其精銳據山峪，列礮象拒戰。我索倫勁騎突陣潰之。定國復出兵四千自巔馳下，橫截我師。我師夾擊，奪其山。定國且走，連日敗之于興業，又敗之于橫州。廣東州邑悉復，遂移兩廣總督于梧州。劉文秀亦于十二年率衆六萬戰艦千餘出川峽，遣其黨盧名臣、馮雙禮分犯岳州、武昌，爲都統辰泰、荊州兵邀截。文秀回舟，寇常德。我荊州、長沙兵皆赴援，設伏城外。俟其過半，突出夾擊，大敗之。六戰皆捷。

火其戰艘斬獲無算。盧名臣赴水死。文秀及雙禮遁回貴陽。可望使文秀守雲南。時定國及文秀兩軍皆衰弱。惟可望踞貴陽。益跋扈。擅殺從臣宗室。偏辱其主于安隆。自設內閣六部。立太廟。制朝儀。盡易印文爲八疊。桂王懼甚。密遣人封定國。晉王文秀安南王。召定國兵入衛。可望微聞之。以十三年春遣關有才襲定國于南寧。又使白文選徙其主于貴陽。未就道而定國已冒

大清旗幟。敗關有才兵于田州。遂抵安隆。奉桂王赴文秀于雲南。可望大怒。以十四年秋大舉攻桂王。兵十餘萬。使文選統諸軍前行。留馮雙禮守貴陽。可望率馬進

忠賀元儀抵交水三岔河與定國文秀夾水而陣使馬寶由尋甸間道襲桂王于滇城諸將皆不直可望約陣而不戰定國悉精銳突其中堅諸軍皆解甲大呼迎晉王可望大敗反走馬寶亦歸于定國文秀文選窮追至貴陽馮雙禮亦鼓噪驅之截其子女金帛以降于滇可望攜千餘人走湖南降洪承疇軍前 召至京封義

王時順治十有四年十月也方可望未降以前我四川

總督李國英駐保寧經略洪承疇駐長沙大將軍辰泰

及阿爾津先後駐荊州

十二年辰泰卒以都統阿爾津代之同都統卓羅駐荊州而祖

澤潤分防長沙都統朱馬喇班師回京

尚可喜等分駐肇慶廣州遇出犯

湖南川北廣東之寇則擊卻之出境亦不窮追以諸賊皆百戰之餘地險兵悍姑以雲貴及川東南爲其延喘地及可望降知諸寇內訌于是洪承疇吳三桂皆奏請乘機大舉

詔以貝子洛託爲寧南靖寇大將軍同經略洪承疇由湖南進吳三桂爲平西大將軍同都統墨爾根李國翰由漢中四川進都督卓布泰爲征南將軍同提督線國安由廣西進三路約會于貴州十五年二月承疇洛託會師常德四月由靖沅鎮遠抵貴陽馬進忠及各官皆先遁三桂以是春發漢中徇重慶克遵義敗明將劉鎮國獲糧三萬石降兵五千又破楊武于

開州進招水西蘭州各土司而桂王大學士文安之復督川東十三家營及譚洪譚諒譚文等以舟師襲重慶李錦十三家營自順治七年冬李錦死梧州堵胤錫卒潯州其衆十餘萬走川東分據川湖間耕屯自給與譚洪等聯絡三桂回軍救之會譚洪譚諒殺譚文以降諸部解散七月三桂復屯遵義于是四川貴州皆略復時

上命信郡王鐸尼爲安遠大將軍總統三路

鐸尼豫親王子

以

六月率禁旅發荊州九月抵貴州平越府大會三路將帥詔承疇同洛託留貴陽理饌而信郡王督諸軍三路入滇每路兵五萬各裹半月糧初文秀旣敗可望後收其潰卒得精銳三萬屯守貴陽且蠶叢漏天磽瘠

艱餉我兵勢難深入而定國忭之召還雲南并召還諸將之在邊者論功小大爲分兵多寡之地及大兵猝至兵失其將將不得兵時文秀已卒于滇定國方討平叛將王士奇關有才而我師已入貴陽十月三路大兵十餘萬俱集戒期入滇定國以西路已有白文選而北盤江爲滇黔之界南盤江爲滇粵之界盤江卽牂牁江也有南北二源乃使馮雙禮扼貴陽之雞公背拒中路雞公河出廣順州歷清鎮修文入烏江距貴陽僅數十里使張光壁扼南盤江之黃草壩拒東路而自守北盤江鐵索橋居中策應十二月三桂以七星關峭岸阻江天險乃由苗疆繞渡出天生橋之背文選驚潰

走烏撤馬寶守可渡河亦奔川師遂抵霑益

七星河下游卽陸廣

河在畢節大定界可渡河卽北盤江之源

廣西軍得泗城土司鄉導由間道

入安隆取下游敵所沉船以濟李定國聞之以兵三萬

倍道趨戰于炎遮河我兵初戰不利詰朝大戰風北來

礮火及茅葦野燎焰天乘勢薄敵營兵火俱烈烈定國

棄營走保北盤江粵師遂由普安州入而信郡王中路

兵亦潰馮雙禮于雞公背

求野錄曰滇師屯雞公背之絕頂餉運甚艱士不宿飽又

間定國之敗遂潰

迨至北盤江敵焚鐵索橋遁我師一夕成浮

橋遂抵曲靖順治十六年正月朔大軍三路入滇城明

桂王已西走永昌洪承疇亦自貴陽赴雲南二月朔信

郡王復令諸軍進追敗白文選于大理之玉龍關定國
令總兵靳統武以兵四千扈桂王奔騰越而自伏精兵
六千于永昌之磨盤山山在潞江南二十里亦名高黎
貢山西南第一穹嶺也鳥道交臂曲通一騎定國度大
兵累勝窮追必不戒設柵數重其間竇名望初伏高文
貴二伏王璽三伏每伏兵二千約俟我師至三伏山巔
號礮起首尾橫突截攻必無一騎返我軍筏渡瀾滄江
潞江逐北數百里無一夫守拒謂定國竄遠隊伍散亂
上山已萬有二千而降官盧桂生來泄其計明大理寺卿
大理知府則前驅已入二伏諸帥急退傳令舍騎而步以礮

發其伏敵兵死林箐中者三之一。伏起而鏖，鬪死者亦三之一。定國坐山巔，聞信礮失序，驚駭忽飛，礮落其前，擊土滿面，乃奔。竇名望、王璽皆戰死，而我軍亦亡都統以下十餘人，喪精卒數千。窮追至騰越西，百有二十里，中原界盡矣。瘴深餉憊，懲磨盤山之役，不復追，降其閣部大臣侯伯將軍總兵以下數十，士馬象駝數萬。

詔以雲貴川廣湖五省蕩平，宣示中外。是冬，洪承疇以疾回京。命吳三桂鎮守雲南。十七年，信郡王鐸尼將軍卓布泰先後班師，留滿漢兵數萬，及西洋大礮以都統伊爾德、卓羅等分屯要鎮。時桂王已入緬甸，李定

國白文選分竄孟艮木邦惟與緬交誼無能患邊雖有
元江土司那嵩叛應之事逾月卽殄僅癰疥若我
朝亦度外置之議徹兵節饒而三桂貪擅兵權必欲俘
永麻爲功遂于十七年有渠魁不翦三患二難之疏乃

命內大臣愛星阿爲定西將軍赴滇會剿頒

勅印于近邊各土司并購緬禽獻十八年九月滿漢土
司兵及降兵七萬五千并炊汲餘丁共十萬由大理騰
越出邊以五萬出南甸隴川猛卯三桂愛星阿將之分
二萬餘出姚關總兵馬寧王輔臣馬寶將之十一月會
師木邦聞白文選方扼錫箔江遣前鋒疾馳三百餘里

及江濱文選已毀橋走茶山我師恐其窺木邦後路乃
令馬寧等軍分道追文選而大軍筏渡趨緬以降人爲
鄉導十二月抵蘭鳩江緬遂執桂王由榔及其母妻子
並從官家口獻軍前文選爲馬寧等追及亦以兵萬餘
象馬數千降班師留提督張勇以萬人守普洱備定國
未幾定國死于景線于是桂藩之局結

戮後川四千里無人烟年吳三桂由保寧趨遵義止定川北
入滇一路其川南則劉文秀部將郝承裔擁衆三萬在
建昌雅州川東則十三家營分據夔歸房竹諸界譚文
餘黨亦據忠涪二州十六年秋巡撫高明瞻收服川西

督撫始自保寧移治成都十七年總督李國英等殲郝承裔于雅黎以靖川南康熙元年故明石泉王復煽土夷寇敘州馬湖李國英徙治重慶二年奏言蜀寇逋竄川湖陝邊界偏攻則易遁小急則互援請三省會剿

詔同西安將軍富喀禪籌之于是以荊州宜昌兵剿遠安興山巴東歸州之賊以興安鄖陽兵剿房縣竹山之賊以四川兵剿夔州建始巫山大寧大昌之賊刻期並進截其走路斬劉體純于巫山之天池寨禽袁宗第于黃草坪又禽東安王朱盛菴于小尖寨先後招降十餘萬川東底定蓋自永麻僭號所招兵皆左良玉李自

成張獻忠之潰餘左良玉大隊皆歸金聲桓殲于江西張獻忠之衆爲四大營燼于滇緬李自成之衆爲十三家營燼于川東非明運之未終乃生民殺運之未旣爾陰節不盡陽節不興故傾否開泰之大人以極剝爲極復

臣源曰貞元肇造則必有熊羆之士不二心之臣

大清之興也兵維八旗將帥皆親藩柿附或疑虎賁爪牙之士有定制有定數其在關外之日

眞人親御

鼓桴以師兵爲營衛故取諸八旗有餘入關以後內衛京師外馭九服四夷且中原鹿駭龍戰尙十餘載

軍麾數道並出安能盡資羽林期門攸飛之力謹告之
曰八旗有禁旅有駐防禁旅八旗滿洲六萬并蒙古漢
軍共十萬其人則皆東海扈倫諸部落無在黑龍江北
寧古塔東者其漢軍亦無遠在山海內者此周廬執戟
之親兵勢不能盡數以行若夫駐防之兵則卽八旗佐
領中之餘丁佐領外之新附隨時編籍人無定額散處
遼河東西諸城無事射獵耕屯有事馳驅介冑故自天
命十一年攻寧遠時兵已十三萬崇德中遠蹂燕薊近
摧寧錦旁撻朝鮮蒙古用兵常十餘萬已不僅六軍矣
平地則八旗並驅險隘則八旗魚貫斯其制也矛楯如

牆前進輕騎旁伺電發又其制也前鋒火器超鹿角以
出陣反則分前鋒之半爲殿又其制也 高宗實勝

寺記曰西師之役命健銳雲梯兵數千爲選鋒凡行陣
參伍彌縫之際略覺鼓餒旗靡處得健銳兵數十屹立
其間則整而復進斬將搯旗雖以索倫兵之馳突一往
而知方守節終不如我滿洲世僕其心定其氣盛

以上原文

乾隆尙爾

國初可知索倫尙不如綠營可知故草

昧經營北討南征日不暇給皆禁旅與駐防迭供撻伐
而周召榮散出入行間暨後豫親王子改封信郡禮親
王改封康鄭親王改封簡肅親王改封顯克勤郡王改

封平亦皆屢充丈人長子之任

諸王封號于乾隆三十年盡仍還原封之名

太廟配享則通達武功慧哲宣猷四郡王外

通達郡王

王皆

顯祖子餘三

景祖子繼以睿禮鄭豫肅勤六王燁矣哉仗

鉞而出繫俘而返開疆敵愾鬱爲功宗燁矣哉百餘載
來且免之化行矣干城之材衆矣故康熙雍正中始不
盡以天潢典兵而乾隆嘉慶宗胄遂無專征之事